

TUTÚ CÚÚ ÒÚ NÍ CADÚ_{HA} TÉ PĀBLÚ QUIHIⁿ NDAHA ÑÁYIU ÑUÚ CÒRINTÚ

Té Pāblú cādūha-dé tutú quihiⁿ ndaha ñáyiú xĩndecu ichi Xítóhó Jesucristú ndécú ñuú Còrintú

¹ Yúhú té Pāblú cāháⁿ-í tnúhu Xítóhó Jesucristú chi ducaⁿ ñi cachí Yă Ndiõxí cunduu. Te cādúha-í tutú-a ndi_{hi} té Timùteú tée ndècu ndi_{hi}-o ichi-gá cuendá daquixi-í ndaha nchòhó ñáyiú xĩndecu ichi Yă Ndiõxí ndécú ñuú Còrintú, te tutú-a cuu-xi tnàhá cuendá nchaa ñáyiú cùu cuendá Yă Ndiõxí xĩndecu nchaa ñuú yĩndèhu distritú Acăyá. ² Te xicáⁿ táhù-í núú Tătá-ó Dútú Ndiõxí ndi_{hi} núú Xítóhó Jesucristú sá ïo na chĩndee chitúu ñaha-gă xii-ndo, te ñu-ni ndi ndùú-gá ná càda te ïo váha cuu iní-ndó cùndecu-ndo.

Té Pāblú cāháⁿ-dé nchaa nàcuáa ndòho-dé

³ Te chí ná cāchí-ó sã ïo váha iní Dútú Ndiõxí Yaá cúú Tătá Xítóhó Jesucristú, te ñu-ni Dútú Ndiõxí cúú-gă Yaá ïo cùndahú iní ñáhá xii-o, te ñu-ni-gá cúú-gă Yaá táxí tnúhu ndee iní. ⁴ Te cuèi nándi ndòho-o ndecu-o dico ñu-ni Dútú Ndiõxí táxí-gă tnúhu ndee iní xii-o, te ducaⁿ quide-gá cuendá sá nchóo cuñaha-o tnúhu ndee iní xii nchaa ñáyiú nándi ndòho ndecu, te ñu-ni nchaa tnúhu ndee iní táxí-gă xii-o ñu-ni nchaa tnúhu ndee iní-án cuñaha-o xii-yu. ⁵ Te Xítóhó Jesucristú ïo ní ndoho-gá, te ducaⁿ nchòo tucu ïo ndòho-o, te ducaⁿ ïo vãi tnúhu ndee iní ñihí-ó ndècu ndi_{hi}-o

chi ndècu-o ndihì Xítohó Jesucrìstú. ⁶ Te nchúhú nándi ndòho-ndí ndécú-ndí cuèndá sá nchòhó níhí-ndó tnùhu ndee ìní cundecu ndihì-ndo te naníhí tàhú-ndó. Te Yá Ndiöxí táxí-gã tnùhu ndee ìní xii-ndí, te ducaⁿ quìde-gá cuèndá sá nchòhó tnàhá-ndó ñhí-ndó tnùhu ndee ìní-áⁿ te naníhí tàhú-ndó, te ducaⁿ càda ndee cada cahnu ìní-ndó ndòho-ndo datná ndóhó nchùhú. ⁷ Te nchúhú ío váha sàni ndáá ìní-ndí cuèndá-ndó chi ndòho-ndo datná ndóhó-ndí, te ducaⁿ tàxi Yá Ndiöxí tnùhu ndee ìní xii-ndo dàtná táxí-gã xii-ndí.

⁸ Te nchòhó ñáyiu ndècu ndihì-ndí ichi Xítohó Jesucrìstú cuìní-ndí cachí tnùhu-ndí xii-ndo nàcuáa ní yáha-ndí cútñàhá ní xíndecu-ndí distritú Àsiá chi dàvá-áⁿ ío ní ndoho-ndí, te luha-ná te vá cùndèe ìní-ndí yáha-ndí nchaa tnúndòho-áⁿ ní cùu chi ní xehndé ìní-ndí sá vã cãcu-ndí. ⁹ Chi ní sani ìní-ndí sá ndíyi-ná cuu-ndí ní cùu, te ducaⁿ ñí yáha-ndí cuèndá sá ío-gá quíndáá ìní-ndí Yá Ndiöxí sá díú-gã taunihnu ñaha-gã xii-ndí, te ñá díú mèe-ndí taunihnu-ndí mée-ndí, te diu-gá cúú-gã Yaá dándòto cuéi ñáyiu sa ní xíhí. ¹⁰ Te diu-ni-gá ní taunihnu ñaha-gã ñá túú ní sàhni ñaha ñáyiu xii-ndí, te diu-ni-gá táunihnu ñaha-gá xii-ndí cuéi vitna, te cùtnuní ndáá ìní-ndí sá díú-ní-gã taunihnu ñaha-gã xii-ndí núú cuàháⁿ núú vëxi te vá cáhni ñaha ñáyiu. ¹¹ Te nchòhó tnàhá-ndó chìndee ñaha-ndo xii-ndí chi càháⁿ ndihì-ndo Yá Ndiöxí cuèndá-ndí, te ío vài ñáyiu càháⁿ ndihì ñàhá-yu xii-gá cuèndá-ndí, te ducaⁿ ío vài ñáyiu ndàcáⁿ táhù-yu núú-gã cuèndá nchaa sá vãha quìde ñaha-gá xii-ndí.

Té Păblú càháⁿ-dé ná cuendá ñá túú ní nàyáha-dé ñuú Còrintú

¹² Te ío váha cùu iní-ndí chi cùtnuní iní-ndí sá cúú-ndí cue tée cùu ndáá dàtná cuení Yă Ndiöxí cunduu ndècu-ndí ñuyíú-a, te diu-ni ducaⁿ quide-ndí sá cúú-xí-ndó chi mee-gă cùndàhú iní ñáhá-gă xii-ndí chíndèe ñaha-gá, te ñá túú quide-ndí dàtná sání ìní cue ñáyiu ñuyíú-a.

¹³⁻¹⁴ Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñá túú ùhú tecú tnùní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuení-ndí sá ío-gá váha tecú tnùní-ndó cuendá sá òré ná quixi tucu Xítóhó Jesucristú, te dàvá-áⁿ ío cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuendá xíáⁿ nùu ní sani iní-í yáha cáháⁿ-í úú xito núú ndécú-ndó cuendá ío cudíí ìní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha cáháⁿ-í núú ndécú-ndó, te òré ndixi tucu-í te nayáha cáháⁿ tucu-í, te òré nayáha cáháⁿ-í te taxi-ndo sã cúú ìchi-í cuendá quíhíⁿ-í distritú Jùdeá, duha ní sani iní-í ní cùu. ¹⁷ Te sá dúcáⁿ ñá túú ní quixi coto ñaha-í xii-ndo te cudana sání iní-ndó sã yùhú ñá túú ní sãha váha-í cuendá nàcuáa ní sani iní-í cada-í, àdi cudana ñáyiu ndècu ichi cuehé ichi duha, chi cue ñáyiu-áⁿ tnaa càchí-yu sá cúú cadá-yu #ⁿ sá sání ìní-yu cadá-yu te tnaa càchí-yu sá ñáhá. ¹⁸ Dico Yá Ndiöxí Yaá ío váha quide ndáá nàha ndáá náhá càxi-gá sá nchùhú ñá túú dàma-ndí sá càháⁿ-ndí. ¹⁹ Te yùhú ndíhi té Sìlvanú ndíhi té Timùteú dánèhé ñáhá-ndí xii-ndo cuendá Xítóhó Jesucristú Yaá cúú Dèhe Yá Ndiöxí,

te Xítoho Jesucristú cúu-gă Yaá ñá túú dàma-gă tnúhu càháⁿ-gă, chi cùu-gă Yaá càháⁿ mee-ni tnúhu ndáá tnúhu cuíti. ²⁰ Te ñiu-ni Xítoho Jesucristú cúu-gă Yaá quidé nchàa nacuáa ní cachí Yă Ndiöxí. Te sá cuendá sá dúcáⁿ quide Xítoho Jesucristú xiáⁿ càchí-ó sã ïo càhnu cuu Yá Ndiöxí. Te nchaa-o na càchí-ó sã díú-ní dùcaⁿ na cada-gă. ²¹ Te mee Yă Ndiöxí quidé-gă ndécú-ní-ó ìchi Xítoho Jesucristú. Te ñiu-ni mee-gă ní cáháⁿ ñáhá-gă xii-o cuendá cunu cuechi-o nùú-gă. ²² Te Yá Ndiöxí ní quide-gă sá nchóó cùu-o ñáyiu cùu cuendá-gă, te ní taxi-gă Espíritú-gă ní ngúndecu ndihi-o cuendá cutnùní iní-ó sã ndáa cada ñaha-gă xii-o nàcuáa ní cachí-gă cada-gă.

²³ Te Yá Ndiöxí náhá-gă sá yùhú càháⁿ ndáá-í ná cuendá vátá quíxí-gă-í quixi coto ñaha-ï xii-ndo, te vátá quíxí-gă-í chi ñá túú cuíní-í dandìhú-í iní-ndó. ²⁴ Te nchúhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yă Ndiöxí, chi sa sàndáá váha iní-ndó-gă, chi nchúhú cuíní-ndí chindee tnúhu ñaha-ndí xii-ndo nàcuáa ío-gă cudíí iní-ndó cùndecu-ndo.

2

¹ Te ní sani ndáá iní-í sá vã quíxí ndíhi-ni-í quixi coto ñaha-ï xii-ndo cuendá sá vã dándìhú-í iní-ndó. ² Te nchòhó cúu-ndó ñáyiu tàxi tnúhu ndee ìní xii-í cúdíí ìní-í ndécù-í, te xiáⁿ nùu ñá túú cuíní-í dandìhú-í iní-ndó, chi núu ducaⁿ na càda-í te vá cùndècu váha-gă iní-ndó nàcuáa taxi-ndo tnúhu ndee ìní xii-í. ³ Te xiáⁿ nùu ní tendaha-ï tutú véxi ndaha-ndo cuendá sá òré quixi coto ñaha-ï xii-ndo,

te dàvá-áⁿ quini-í sá quidé-ndó nàcuáa cudíí ìní-í te ñá díú dà dandihú-ndó ìní-í òré quexìo-í, chi nchòhó tàú-ndó càda-ndo sá yùhú cudíí ìní-í. Te cùtnuní ndáá ìní-í sá nùu yùhú cudíí ìní-í te tnàhá nchòhó cudíí ìní-ndó cuèndá sá dúcáⁿ cùdíí ìní-í. ⁴ Te ndàhyú-í sá ndihú ìní-í òré ní cadúha-í tutú ní dáquixì-í ndaha-ndo, chi ío cuéhé sã sání ìní-í, te ñá túú ní dàquixi-í tutú-áⁿ ndaha-ndo cuèndá sá dándihú ìní ñáhà-í xii-ndo, chi ní dáquixì-í cuèndá sá nchòhó cutnùnì ìní-ndó sã ìo cùu ìní ñáhà-í xii-ndo.

Nàcuáa tàú ñáyiu ñuú Còrintú cadá-yu cuèndá ìⁿ ñáyiu ñá túú quide ndáá

⁵ Te na càchí tnúhu-í xii-ndo cuèndá ìⁿ téé ní quide ìⁿ sá ñà túú tàú-dé cada-dé ndécú ndìhi-ndo, te ní quide ndàhú-xi luha ìní-í cuèndá sá ñí quide-dé-áⁿ dico nchòhó tnàhá-ndó ñí dándihú-dé luha ìní-ndó, te duha càchí-í sá lúhá-ní ñí dándihú-dé ìní-ndó cuèndá sá vã cuídó-gá-í ná tnúhu cáháⁿ-í. ⁶ Te nàcuáa ní ndatnúhu-ndo ñí quide ndáá-ndó cuèchi téé-áⁿ te sa ndói-gá cuu nàcuáa ní quide-ndo-dě. ⁷ Te vitna tàú-ndó càda cahnu ìní-ndó sã ñí quide-dé, te cuáñaha-ndo tnùhu ndee ìní xii-dé chi núu ñáhá te vá ñihí ndéé-gã-dé cada-dé sá vãha cuèndá sá ndihú ìní-dé. ⁸ Te xiáⁿ nùu càháⁿ ndàhú-í núú-ndó sã cadá tùcu-ndo sá cúú ìní-ndó-dě. ⁹ Te dju-ni cuèndá iha càháⁿ-í ìⁿ núú tütú sá sà ní dáquixì-í ndaha-ndo, te ducaⁿ ñí quide-í xitó ndèé ñáhà-í xii-ndo nùu ndisa cuìní-ndó càda-ndo nchaa nacuáa càháⁿ-í. ¹⁰ Te ndéda-ni càa ñáyiu na càda cahnu ìní-ndó ìⁿ sá quidě-yu, te tnàhá yùhú cada càhnu ìní-í

sá quidě-yu tucu. Te núu ió ñⁿ sá xíní ñùhu-xi cada cahnu iní-í te quide cahnu iní-í, te mee Xítohó Jesucrístú náhá-gă sá dúcáⁿ quide-í, te ducaⁿ quide-í cuendá sá nchòhó cuu-xi sá vâha xii-ndo. ¹¹ Te ducaⁿ te sácúhná vă nihí-xi ná cada ñaha-xi xii-o, chi nchoo sâ xíní-ó nâcuáa quide-xi.

Té Păblú ndìhú iní-dé ndécú-dě ñúú Tròás

¹² Te ní xica-í cuáháⁿ-í ñúú Tròás cuendá yàcáⁿ cáháⁿ-í tnúhu sá càháⁿ nâcuáa naníhí tàhú-ó tnúhu Xítohó Jesucrístú, te òré ní quexìo-í te ní nihí-í ñⁿ ichi càhnu cáháⁿ-í tnúhu-gá. ¹³ Dico ñá túú ní cùu váha iní-í chi ñá túú ní naníhí-í té Títú tée ndècu ndìhi-o ichi Xítohó Jesucrístú, núu xǎⁿ ní quide ndee ìní tnáhà-í ndìhi cue ñáyiú ñúú-áⁿ, te ní xica-í cuáháⁿ-í distrítú Macèdoniá.

Dàquetíhú-ó yùcu ñávâha chi ndècu ndìhi-o Xítohó Jesucrístú

¹⁴ Te táxǎhu xii Yá Ndiǒxí chi ducaⁿ-ni sànu ichi ñaha-gá xii-ndí nâcuáa cunuu-ndí núú yucu ñávâha chi ndècu ndìhi-ndí Xítohó Jesucrístú, te mee Yă Ndiǒxí sáchiuⁿ ñaha-gá xii-ndí càháⁿ-ndí tnúhu-gá. Te cada iní-ó sǎ tnúhu-gá-áⁿ cúú-xí dàtná ñⁿ yúcu sǎ ïo váha sàháⁿ te ta xíténuu dicó-xi nděni ní cuu cuáháⁿ. Te ducaⁿ sǎtnahá-xi cùu tnúhu-gá chi nchúhú quidé-ndí nâcuáa ta xíténuu nděni ní cuu cuáháⁿ. ¹⁵ Te cùu-ndí dàtná dicó ñⁿ yúcu sǎ ïo váha sàháⁿ, te nâcani cuendá Xítohó Jesucrístú núú Yă Ndiǒxí, te dicó yúcu-ǎⁿ nchítá cuèi núú xǎndecu cue ñáyiú sa ní naníhí tàhú, te cuèi núú xǎndecu cue ñáyiú ta xíta nihnu cuáháⁿ. ¹⁶ Te sá cúú-xí cuè ñáyiú ta xíta nihnu cuáháⁿ-áⁿ, dicó yúcu-ǎⁿ cúú-xí dàtná ñⁿ sá sáhní ñaha xii-yu, dico

sá cúú-xí cuè ñáyiú sa ní naníhí tàhú, dicó yúcu-ǎn cúú-xí dàtná ìⁿ sá ndécá ìní-yu, ducaⁿ sǎtnahá-xi cùu nchúhú. Te vitna chí cuǎha cuèndá nǔu ná cúú ñáyiú sàni ìní-ndó ndàcu cada nacuáa ndùu tnúhu càháⁿ-í-a. ¹⁷ Chi nchúhú càháⁿ-ndí tnúhu Yá Ndiǒxí dico ñá túú ndǎhú quidé-ndí ndìhi tnúhu-gá dàtná xǐquide dava-gá-güedé, chí quide ndáá-ndí càháⁿ-ndí tnúhu-gá, te mee-gǎ ní cachí-gá sá dúcáⁿ càda-ndí te ndèhe-gá sá nchǔhú quidé-ndí nàcuáa ní cachí-gá, chí ndècu ndìhi-ndí Xítóhó Jesucristú.

3

Cuèndá ìngá núú sǎ vǎha ní cachí Yǎ Ndiǒxí cada-gá ñáyiú

¹ Te cuèi duha càháⁿ-ndí núú-ndó dico ñá túú xìni ñuhu-xi sá cǔñaha-ndí xii-ndo sǎ cúú-ndí cue téé quide váha, te ni ñà túú xìni ñuhu-xi cacanehe-ndí ìⁿ tutú núú càháⁿ-xi sá cúú-ndí cue téé váha danèhé ñáhá xii-ndo datná xǐquide dava-gá-güedé, te ni ñà túú xìni ñuhu-xi sá nchòhó taxi-ndo ìⁿ tutú núú càháⁿ-ndó sǎ nchǔhú cúú-ndí cue téé quide váha. ² Te ñá túú xìni ñuhu-xi ducaⁿ cada-ndí. Te cùtnuní ndáá ìní-ndí sá nchòhó cúú-ndó dàtná ìⁿ tutú sá ìo váha càháⁿ cuèndá-ndí. Te ducaⁿ sǎtnahá-xi cùu-ndo chí nchaa ñáyiú ñihí-yu tnúhu nàcuáa quide-ndo ndecu-ndo, te xǎⁿ cùtnuní ìní-yu sá nchǔhú cúú-ndí cue téé quide váha. ³ Te nchòhó cúú-ndó cuèndá Xítóhó Jesucristú, te cùu-ndo datná tutú-gá te tutú-áⁿ ní táuchíuⁿ-gǎ xii-ndí ní cadúha-ndí, te mee-ni ndìhi Espíritú Yá Ndiǒxí ní ngúndeé tnúhu-áⁿ te ñá díú ndìhi tindá ní ngúndeé. Te ñá díú ìⁿ núú yúú ní

ngũndeé chi iní-ndó cùu-xi núú dúcáⁿ nĩ ngũndeé
tnúhu-áⁿ te ducaⁿ sãtnahá-xi cùu-ndo.

⁴ Te duha cãháⁿ-ndí chi cùtnuní ndáá iní-ndí sá
Yã Ndiõxí quidé vãha ñaha-gã xii-ndí, chi ndècu
ndihí-ndí Xítóhó Jesucristú. ⁵ Te nchúhú chi
ndàcu-ndí quidé-ndĩ sá vãha dico ñá díú mèe-ndí
ducaⁿ ndàcu-ndí quidé-ndĩ, chi mee Yã Ndiõxí
chíndèe ñaha-gã xii-ndí nõu ndàcu-ndí quidé-ndĩ sá
vãha. ⁶ Te mee Yã Ndiõxí ní quide-gá sá nchúhú
ndacu-ndí cunu cuechi-ndĩ núú-gã cáháⁿ-ndí núú
ñáyiu cuendá ingá núú sã vãha ní cachí-gá cada
ñaha-gã xií-yu. Te sá vãha ní cachí-gá cada ñaha-gã
xií-yu-áⁿ ñà túú ìⁿ-ni cuu-xi ndihí nchaa tnúhu sá
nĩ xáhaⁿ-gã xii ndíi Moisés ní chídó tnùní ndíi, te
ducaⁿ chi espíritú Yã Ndiõxí néhé chùuⁿ-xi nchaa
tnúhu sá cãháⁿ cuendá nchaa sá vãha-áⁿ. Te nchaa
tnúhu ní chídó tnùní ndíi Moisés, dándixi túu-xi
iní nchaa ñáyiu ndècu ndihí tnúhu-áⁿ sã cuíta ni-
hnú-yu cuendá nchaa cuéchi-yu, dico cue ñáyiu
ndècu ndihí Espíritú Yã Ndiõxí ñáyiu-áⁿ ndécú
ndihí-yu tnúhu ndee iní sá cãcu nihnú-yu.

⁷ Te tnúhu sá nĩ cáháⁿ Yã Ndiõxí ndéé díhna
nàcuáa cada ñáyiu ní ngũndeé-xi ìⁿ núú yúú
quèhéⁿ. Te òré ní dátũu ndíi Moisés nàcuáa cãháⁿ
tnúhu sá nĩ cáháⁿ Yã Ndiõxí ndèé núú yúú-ãⁿ nõú
cuè ñáyiu isràél, te súúni nĩ tásaⁿ núú ndíi te ñá
túú-gã ní cùu cundehé-yu núú ndíi, te ducaⁿ-gã
ducaⁿ-gã quidé-xí datásaⁿ-xi núú ndíi ni cùu ñá
túú-gã ducaⁿ ni quide-xi. Te tnúhu ndèé núú
yúú-ãⁿ dándixi túu-xi iní cue ñáyiu sá cuíta ni-
hnú-yu sá cuendá nchaa cuéchi-yu, te ío váha ní
quide-xi cútnahá ní ngũndecu ndihí cue ñáyiu isràél

tnúhu-án. ⁸ Te sá dúcáⁿ nǐ quide-xi xiáⁿ cútnùní sá tnúhu càháⁿ Espíritú Yá Ndiöxí vitna uuⁿ-gá ducaⁿ ïo-gá váha quide-xi. ⁹ Te núu ducaⁿ ïo váha ní quide-xi cútnàhá ní ngúndecu ndihí cue ñáyiú isràél tnúhu sá dándìxi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gá ducaⁿ vǎha quide-xi vitna ní ngúndecu ndihí-o tnúhu sá càháⁿ nàcuáa quide Yá Ndiöxí cuèndá sá vǎ cùndècu-gá cuéchi ñáyiú núú-gǎ. ¹⁰ Te vá càchí-ó sǎ cùtnàhá ní ngúndecu ndihí cue ñáyiú isràél tnúhu ndéé núú yúú-ǎⁿ ïo-gá váha ní quide-xi, te ñáhá chi uuⁿ-gá váha quide-xi vitna cuèndá tnúhu sá càháⁿ nàcuáa quide Yá Ndiöxí. ¹¹ Te núu ducaⁿ ïo váha ní quide-xi cútnàhá ní ngúndecu ndihí ñáyiú isràél tnúhu sá ñà túú ní cùdí, te uuⁿ-gá ducaⁿ ïo váha quide-xi vitna ní ngúndecu ndihí-o tnúhu sá vǎ ndíhí nihnu tnahí-gá.

¹² Te cùtnuní iní-ndí sá vǎ ndíhí nihnu sá dúcáⁿ ïo váha quide-xi, núu xiáⁿ ío vii ío váha cùu iní-ndí càháⁿ-ndí tnúhu sá nǐ ngúndecu ndihí-o. ¹³ Te ñá túú quide-ndí dàtná ní xóo cada ndí Moisés, chi ndí-ǎⁿ nǐ xóo dàdáhu ndí núú ndí òré dátǎsaⁿ-xi núú ndí cuèndá sá vǎ quíni cue ñáyiú isràél òré ñá túú-gǎ dátǎsaⁿ-xi núú ndí. ¹⁴ Te cue ñáyiú isràél ñá túú ní tècú tnùní váha-yu nàcuáa ní xóo danèhé ñáhá ndí Moisés xií-yu, te cuèi ndéé vitna ñá túú tècú tnùní-yu òré dácuàhá-yu tnúhu sá nǐ cáháⁿ Yá Ndiöxí ndéé díhna nàcuáa cada-gá, te cada iní-ó sǎ dàtná sá nǐ xídáhu núú ndí Moisés yídáhu núú-yu cuèndá sá vǎ cútnùní núú-yu cundèhé-yu te tecú tnùní-yu, dico núu tnahá tnúhu-yu ndihí Xítóhó Jesucristú te tecú tnùní-yu. ¹⁵ Te cuèi ndéé vitna

òré dácuàhá-yu nchaa tnúhu sá nǐ chídó tnùnǐ ndíi Moisés nchaa núú tütú ndíi, te cada iní-ó sǎ dàtná sá nǐ xídáhu núú ndíi yídáhu núŷ-yu chi ñá túú tècú tnùnǐ-yu. ¹⁶ Dico cue ñáyiú na tùha ñaha xii Xítohó Jesucrístú te tècú tnùnǐ-yu tnúhu-gá. ¹⁷ Te Xítohó Jesucrístú ìⁿ-ni cùu-gá ndihí Espíritú Yǎ Ndiöxí, te nchaa ñáyiú ndècu ndihí Espíritú-gá ñá túú-gǎ táxí tnùnǐ ñáhá nì ìⁿ sá ñà túú vǎha xií-yu. ¹⁸ Te dàtná cúú ìⁿ yutátá sǎ dánèhé núú ñáhá-xí xii ñáyiú ìⁿ sá vǎha, ducaⁿ sǎtnahá-xi cùu-o chi quide-o nacuaá cáháⁿ ñáyiú sá ïo càhnu cuu Xítohó Jesucrístú, te ducaⁿ ùuⁿ-gá uuⁿ-gá tá cùndáá-ó ndècu-o ichi-gá dàtná quidé mèe-gá quidé ndǎá-gá. Te Espíritú-gá quidé-xí dùcaⁿ ta cundáá-ó núŷ-gǎ cuáháⁿ.

4

¹ Te mee Yǎ Ndiöxí ní cundàhú iní ñáhá-gǎ xii-ndí ní taxi-gá chiúⁿ quide-ndí càháⁿ-ndí tnúhu-gá, núu xǎⁿ ñá túú tnàhí nàtúhú iní-ndí càháⁿ-ndí tnúhu-gá. ² Te nchúhú dàquee tíhú-ndí nchaandi túhú sá ñà túú vǎha quide dayuhu ñáyiú, chi nchaa xǎⁿ cúú-xí ìⁿ sácáⁿnúú sǎ cúú-xí-yu, te nchúhú ñá túú sàni iní-ndí dandàhú-ndí ñáyiú te ni ñǎ túú sàni iní-ndí dama-ndí nàcuáa càháⁿ tnúhu Yá Ndiöxí, chi càháⁿ ndáá-ndí nàcuáa tàú-xi cáháⁿ-ndí, te mee Yǎ Ndiöxí náhá-gǎ nàcuáa ndùu tnúhu càháⁿ-ndí núú ñáyiú, te ñáyiú-áⁿ cùtnùnǐ iní-yu sá nchúhú càháⁿ váha-ndí. ³ Te cue ñáyiú ñá túú tècú tnùnǐ nàcuáa ndùu tnúhu sá càháⁿ nàcuáa naníhí tàhú-ó càháⁿ-ndí núŷ-yu, ñáyiú-áⁿ cúŷ-yu ñáyiú ta xíta nihnu cuáháⁿ. ⁴ Te cue ñáyiú-áⁿ

cúu-yu ñáyiú ío sàá iní-xi chi ñá túú cuení-yu quíndáá iní-yu tnúhu Xítohó Jesucrístú, te xíáⁿ nùu sácúihná cúnù-xi núu-yu te ñihí-xi nàcuáa quíde-xi dadáhu ndodo iní ñáhá-xí xii-yu cuendá sá vǎ təcú tnùní-yu tnúhu sá càháⁿ nàcuáa naníhí tàhú-yu, te tnúhu-áⁿ cúu-xí tnúhu sá ïo váha chi càháⁿ-xi sá ïo càhnu cuu Xítohó Jesucrístú, te cùu-gá dàtná mée Tátá-gǎ Dútú Ndiöxí. ⁵ Te nchúhú ñá túú càháⁿ-ndí cuendá sá cúu-xí mée-ndí núu-ndó chi càháⁿ-ndí cuendá Xítohó Jesucrístú, te càchí-ndí xii-ndo sǎ díú-gǎ cúu-gǎ Yaá ío cùnuu, te càchí-ndí xii-ndo sǎ mée-ndí cúu-ndí dìcò-ni cue tée xínu cuechi sá cúu-xí-ndó, te ducaⁿ quíde-ndí nàcuáa cuu vii cuu váha iní Xítohó Jesucrístú. ⁶ Te Yá Ndiöxí Yaá ní dáyèhé ndée cútnàhá nee ñuyíú ní cùu, Yaá-áⁿ ñí cachí-gá sá Xítohó Jesucrístú cada-gá nàcuáa tecú tnùní-ó sǎ ïo càhnu cuu mee Yá Ndiöxí. Te sá dúcáⁿ ñí quíde-gá te cada iní-ó sǎ dàtná tnúhu sá ñí dáyèhé-gá iní-ó.

Ío quíndáá iní-ó Yǎ Ndiöxí

⁷ Te nchúhú ndécú ndíhi-ndí tnúhu Xítohó Jesucrístú, te tnúhu-gá cúu-xí dàtná ìⁿ sá ïo váha ñùhu ìⁿ xití quídi ñuhu, te nchúhú cúu-ndí dàtná quídi-áⁿ. Te ducaⁿ sǎtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te ducaⁿ cùu nacuáa cutnùní sá mée Yǎ Ndiöxí quíde-gǎ nchaa sá váha te ñá díú mée-ndí. ⁸ Te cuèi ío ndòho-ndí ndécú-ndí dico ñihí-ndí nàcuáa quíde-ndí tá yǎha-ndí nchaa tnúndòho-áⁿ cuǎháⁿ, cuèi áma sa ndètu vií-nǎ quehdé iní-ndí sá vǎ ndácú-ndí yǎha-ndí nchaa tnúndòho-áⁿ, dico ndàcu-ndí yǎha-ndí. ⁹ Te cuèi

nànducu ñaha ñáyiu cuìní-yu ná cada ñàhá-yu xii-ndí dico ñá túú dàña ñaha Yá Ndiöxí xii-ndí, te cuëi cànihá-yu xii-ndí dico cǎcu-ndí ñá túú sàhni ñahá-yu. ¹⁰ Te nděni ní cuu cuáháⁿ-ndí xícá cùu-ndí, te cǎcu cǎcu cahni ñàhá-yu xii-ndí dàtná ní quidé-yu Xítóhó Jesucristú, te ducaⁿ yǎha-ndí cuendá cutnùní sá ndécú tũu Xítóhó Jesucristú andiu te chìndee ñaha-gá xii-ndí. ¹¹ Te nchúhú ñini ndècu-ndí ñuyú-a te nchaa-ni nduu cǎcu cǎcu cahni ñaha ñáyiu xii-ndí sá cuendá Xítóhó Jesucristú, te ducaⁿ yǎha-ndí ndécú-ndí cuendá cutnùní sá Xítóhó Jesucristú ndécú ndíhi ñaha-gá xii-ndí cuëi vá cúdii yiqui cùñú-ndí cundecu-xi. ¹² Te sá dúcáⁿ cǎcu cǎcu cahni ñaha ñáyiu xii-ndí xǎⁿ nchòhó uuⁿ-gá tá ñihí ndéé-ndó cuáháⁿ ndécú-ndó ìchi Xítóhó Jesucristú.

¹³ Te ñⁿ téé ní xíndecu ndéé sanaha ñí chídó tñuní-dé núú tütú Yá Ndiöxí núú cǎchí-xi: “Yúhú ní sándáá iní-í Yá Ndiöxí núu xǎⁿ ní cǎháⁿ-í”, duha ní cǎchí téé-áⁿ. Te dàtná-ni ní sani iní téé-áⁿ ñí cǎháⁿ-dé te ñiu-ni ducaⁿ sàni iní nchúhú tucu núu xǎⁿ cǎchí-ndí: “Sándáá iní-ndí Yá Ndiöxí núu xǎⁿ cǎháⁿ-ndí”, duha cǎchí-ndí. ¹⁴ Te cùtnuní iní-ndí sá núu na cùú-ndí te Yá Ndiöxí dandòto ñaha-gá xii-ndí dàtná ní dándótó-gǎ Xítóhó Jesucristú, te tñhá nchòhó ducaⁿ càda ñaha-gá xii-ndo, te dàvá-áⁿ candeca ñaha-gǎ xii-o quíhíⁿ nucúndecu-o núú-gǎ. ¹⁵ Te nchúhú nándi cùu sá tá yǎha-ndí véxi cuendá nchòhó ngúndecu váha-ndo, te ducaⁿ cuíta cáyá-gá ñáyiu ngúndecu váha sá xíí Yá Ndiöxí, te ñiu-ni ducaⁿ cuíta cuu vai-gá ñáyiu ndacáⁿ táhũ-yu

núu-gă te cachí-yu sá ïo cãhnu cuu-gá.

¹⁶ Te xĩãⁿ nõu nchúhú ñã túú tnàhí nàtúhú iní-ndí ndécú-ndí ichi Xítohó Jesucristú, te cuèi yiqui cùñú-ndí tá xàú-xi cuáháⁿ dico iní-ndí chi uuⁿ-gá uuⁿ-gá tá nihí ndéé-xí cuáháⁿ. ¹⁷ Te nchaa sá ndóhó-ndí ñuyiú-a ñã túú cãchí-ndí sá cúú-xí ìⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí náandi ndòho-ndí ndécú-ndí ñuyiú-a te Yá Ndiõxí ío váha cada ñaha-gă xii-ndí nduu na sàá-ndí núú ndécú-gă, te diu-ni ducaⁿ càda ñaha-gá xii-ndí ni caa ni quíhíⁿ. ¹⁸ Te nchúhú ñã túú nchìcúⁿ nihnu-ndí sá tũu ndèhe-ndí ío ñuyiú-a, chi nchìcúⁿ nihnu-ndí sá vátá quini-gá-ndí ndécú àndiu, te ducaⁿ quide-ndí chi nchaa sá tũu ndèhe-ndí ío ñuyiú-a vá cúdĩ-xi cundecu-xi, te nchaa sá ñà túú tũu ndècu andiu xĩãⁿ cudí-xi cundecu-xi ni caa ni quíhíⁿ.

5

¹ Te yiqui cùñú-ó cùu-xi datná ìⁿ vehe, te vehe-áⁿ ñà túú cúdĩ-xi, te ducaⁿ sãtnahá-xi cùu yiqui cuñú-ó chi vá cúdĩ-xi, te na sàá nduu vã cúndècu-gá-ó ndíhi yiqui cuñú-ó, te Yá Ndiõxí taxi-gá ìⁿ yiqui cùñú sáá sã cúú-xí-ó, te xĩãⁿ cúú-xí dàtná ìⁿ vehe sá ñà túú ní càdúha cue ñáyiu ñuyiú-a, chi mee Yã Ndiõxí ní cadúha-gá vehe-áⁿ te vehe-áⁿ cudí-xi cundecu-xi ni caa ni quíhíⁿ andiu. Te ducaⁿ sãtnahá-xi cùu yiqui cuñú sá táxí Yã Ndiõxí xii-o chi cudí-xi cundecu-xi ni caa ni quíhíⁿ. ² Te nchúhú ndècu ndíhi-gá-ndí yiqui cùñú-ndí sá ndécú ndíhi-ndí vitna te sama cuini-ndí sá ïo ndíhi

taxi Yă Ndiõxí yiqui cùñú sáá cùndecu ndihi-ndí.
 3 Chi mee-gă vá dáñá-gă sá dúcáⁿ-ní cùnduu-ndí
 cundecu-ndí, chi dai taxi-gă yiqui cùñú sáá-ăⁿ
 xii-ndí. 4 Te nini ndècu-ndí ndihi yiqui cùñú-ndí
 vitna ío sàni iní-ndí te ndìhú iní-ndí, dico ñá díú
 să dúhá quide-ndí te ñá túú-gă tnàhá iní-ndí cun-
 decu-ndí ndihi yiqui cùñú-ndí, chi cuìní-ndí sá
 Yă Ndiõxí ío ndìhi taxi-gă yiqui cùñú sáá nduu
 táhú-ndí, chi xíăⁿ cudíi-xi ni caa ni quíhíⁿ te yiqui
 cùñú-ndí sá tá ndìhi nihnu cuáháⁿ-a vá cúđi-xi
 cundecu-xi. 5 Te ducaⁿ tnàhí ní cachí Yă Ndiõxí
 cunduu sá dúcáⁿ nduu táhú-ó yiqui cuñú sáá-ăⁿ, te
 ní taxi-gă Espiritú-gă ní ngúndecu ndihi-o cuendá
 cutnùní iní-ó să ndàá taxi-gă yiqui cùñú sáá-ăⁿ
 nduu táhú-ó.

6 Te xíăⁿ nũ nchúhú nihí ndéé-ndí ndécú-ndí,
 te cùtnuní iní-ndí sá nini ndecu-ndí ndihi yiqui
 cùñú-ndí sá ndécú ndìhi-ndí vitna te vátá
 sáá-gă-ndí cundecu-ndí mei nũú ndécú Xítohó
 Jesucrístú. 7 Te ducaⁿ cùtnuní iní-ndí chi sàndáá
 iní-ndí Yă Ndiõxí ndécú-ndí ñuyíú-a cuèi ñá túú
 xìní-ndí-gă. 8 Te ío váha cùu iní-ndí ndécú-ndí, te
 sàni iní-ndí sá vâha-gă sá nũú vá cùndècu-gă-ndí
 ndihi yiqui cùñú-ndí sá ndécú ndìhi-ndí vitna.
 Te ducaⁿ sàni iní-ndí chi váha-gă cundecu-ndí
 mei nũú ndécú Xítohó Jesucrístú. 9 Te ío ndùcu
 ndee-ndí quidé-ndí nàcuáa cuu vii cuu váha iní
 Xítohó Jesucrístú vitna ndècu-ndí ñuyíú-a, te
 điu-ni ducaⁿ càda-ndí cuèi òré vá cùndècu-gă-ndí.
 10 Te dacuítíi să ncháá-ó cùndecu-o núú Xítohó

Jesucristú ìⁿ nduu, te dàv-áⁿ mee-gă cáh-áⁿ-gá te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gă nduu táhú-ó.

Nàcuáa ní cuu ní ngúndecu váha-o ndìhi Yá Ndiõxí

¹¹ Te nchúhú quíyuhú iní-ndí nàcuáa cada Xítohó Jesucristú, núu xíáⁿ càh-áⁿ-ndí tnúhu-gá núu ñăyiu cuendá xínu iní-yu tuha ñàhá-yu xii-gá. Te mee Yá Ndiõxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùnì iní-ndó nàcuáa quide-ndí ndécú-ndí. ¹² Te sá dúhá càh-áⁿ-ndí te vá cánì iní-ndó sã nchúhú càh-áⁿ váha-ndí cuendá-ndí nàcuáa nchòhó cuu váha iní ñàhá-gă-ndó xii-ndí te ñàhá, chi duha càh-áⁿ-ndí cuendá sá nchòhó níhí-ndó tnúhu cáh-áⁿ váha-gá-ndó cuendá-ndí núu ñăyiu. Te ducaⁿ ñíhí-ndó tnúhu cúñaha-ndo xii cue ñăyiu quide nínu mee-xi, chi cue ñăyiu-áⁿ ñà túú quide cuendá-yu nása ndècu iní-yu. ¹³ Te núu nchòhó sání iní-ndó sã lúcú-ndí cuendá nàcuáa quide-ndí ndécú-ndí te cùu-xi cuendá Yá Ndiõxí, àdi núu sàni iní-ndó sã ñà túú lúcú-ndí cuendá nàcuáa quide-ndí ndécú-ndí te cùu-xi sá vâha sá cúú-xí-ndó. ¹⁴ Te quide-ndí nàcuáa cuìní Xítohó Jesucristú chi cùtnunì iní-ndí sá ìo cùu iní-gá nchaa ñăyiu, te ducaⁿ xínì ndáá-ndí sá ñí xíhí-gá cuendá ncháá-yu, te xíáⁿ núu cada iní-ó sã dàtná tnúhu sá ncháá ñăyiu ní xíhí-yu ndìhi-gá. ¹⁵ Te ducaⁿ ñí xíhí Xítohó Jesucristú cuendá nchaa ñăyiu chi cuìní-gá sá ncháá-yu cundécú-yu cadá-yu nàcuáa

cuiní méé-gă te vá cáďă-yu năcuăa cuiní méě-yu, chi mee-gă ní xíhí-gă te ní ndoto-gă cuendá cuu-xi sá văha sá cúú-xí-yu. ¹⁶ Te xíăⁿ nŭu nchúhú ñá túú-gă ná sání ìní-ndí cuendá tnàha ñăyiu-ndí nŭu nàndíhi-yu àdi ñá túú nàndíhi-yu dàtná ní xóo cani iní-ndí cútnàhá ní xíndecu-ndí ichi cuèhé ichi duha, te dàvâ-áⁿ nŭ xóo cani iní-ndí cuendá Xítohó Jesucristú dàtná sání ìní cue ñăyiu ndècu ichi cuehé ichi duha vitna. ¹⁷ Te nchaa nchoo ñăyiu ní tnahá tnúhu ndihí Xítohó Jesucristú ní nduu-o dàtná ìⁿ ñăyiu saa, te ducaⁿ chi ñá túú-gă quidé-ó dàtná ní xóo cada-o cŭtnàhá ní xíndecu-o ìchi cuehé ichi duha, chi ní ngúita-o quide-o mee-ná sá văha te nchaa xíăⁿ cúú-xí să sáá să cúú-xí-ó chi vátá quíní-gá-ó càďa-o.

¹⁸ Te ducaⁿ quide-o ndecu-o chi mee Yă Ndiôxí quidé-gă sá dúcáⁿ càďa-o cundecu-o. Te Xítohó Jesucristú ní quide-gă ní ngúndecu váha-o ndihí Yă Ndiôxí vitna, te ducaⁿ chi mee Yă Ndiôxí ducaⁿ tnàhí ní cachí-gă cunduu, te diu-ni mee Yă Ndiôxí ní taxi-gă chùⁿ quide-ndí càháⁿ-ndí tnúhu-gă năcuăa ngúndecu váha cue ñăyiu ndihí-gă. ¹⁹ Te ducaⁿ chi mee-gă ní cachí-gă sá Xítohó Jesucristú cada-gă năcuăa nucúndecu váha nchaa nchoo cuè ñăyiu ndècu ñuyíú-a ndihí Yă Ndiôxí. Te nchaa ñăyiu ní tuha ñaha xì-gă ñá túú-gă sání ìní-gă sá ñăyiu-áⁿ nacháhu-yu cuéchi-yu núú-gă. Te mee Yă Ndiôxí ní taxi-gă chùⁿ quide-ndí càháⁿ-ndí tnúhu-gă núú ñăyiu năcuăa ngúndecu ndihí ñaha văha-yu xii-gă. ²⁰ Te Xítohó Jesucristú ní cachí-gă sá nchúhú càháⁿ-ndí tnúhu-gă núú nchàa ñăyiu, te

sá dúhá quide-ndí cãháⁿ-ndí tnúhu-gá te quide-ndí núú Yã Ndiõxí cãháⁿ-ndí yuhu-gá, te xíãⁿ núu cãháⁿ ndàhú-ndí núú-ndó sã tnàhá tnúhu-ndo ndìhi Yá Ndiõxí cuendá cundecu váha-ndo ndìhi-gá, te duha cãháⁿ-ndí chi ducaⁿ cãchí Xítohó Jesucrístú cada-ndí. ²¹ Te Xítohó Jesucrístú cúú-gã Yaá ñá túú tnàhí cuéchi-xi, dico Yá Ndiõxí ní quide ñaha-gã xii-gá dàtná ìⁿ ñáyiu ndècu cuéchi-xi, te ducaⁿ chi Xítohó Jesucrístú ní xido-gá cuéchi nchaa nchoo ñáyiu ñuyúú-a, te ducaⁿ ñí xido Xítohó Jesucrístú nchaa cuéchi-o cuendá sá núu na tnàhá tnúhu-o ndìhi-gá te cudìu-o núú Yã Ndiõxí, te ducaⁿ ñí cuu chi mee Yã Ndiõxí ducaⁿ ñí cachí-gá cunduu.

6

¹ Te nchoo ìⁿ-ni cùu-o quide chiuⁿ-o cuendá Yã Ndiõxí núu xíãⁿ cãháⁿ ndàhú-ndí núú-ndó sã vã dícó-ni ducaⁿ cùndedóho-ndo tnúhu Yá Ndiõxí, chi cada-ndo nàcuáa na chìndee ñaha-ni-gá. ² Chi mee-gã cãchí-gá ìⁿ xichi núú tütú-gá núú cãchí-xi: Sáá nduu te cundàhú iní ñáhà-í xii-ndo chìndee ñaha-í cuendá naníhí tàhú-ndó, te ní sáá nduu tàú-xi sá cùndàhú iní ñáhà-í xii-ndo chìndee ñaha-í cuendá naníhí tàhú-ndó, núu xíãⁿ ní xìndedóho-í tnúhu ní cãháⁿ-ndó te ní chìndee ñaha-í xii-ndo nàcuáa naníhí tàhú-ndó. Duha cãchí-gá núú tütú-gá. Te vitna cùu-xi nduu cundahú iní ñáhá Yã Ndiõxí chìndèe ñaha-gá, te cùu-xi nduu naníhí tàhú-ó. ³ Te nchúhú ñá túú quide-ndí ìⁿ sá ñà túú tàú-ndí cada-ndí sá cúú-xí ñáyiu, chi cuìní-ndí sá vã cãháⁿ cuèhé-yu cuendá chiuⁿ quide-ndí. ⁴ Te nchaa sá

quidé-ndí cúú-xí nàcuáa cutnùní iní cue ñáyiú sá nchũhú xínú cuèchi-ndí núú Yă Ndiõxí, te ío quide cahnu iní-ndí cuendá nchaa sá ndóhó-ndí, chi nándi quide ñaha ñáyiú xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yăha-ndí véxi. ⁵ Te duha ta yăha-ndí véxi, núú cánha ñáyiú xii-ndí, núú chíhí ñàhá-yu vecaá, núú cuàá ndeé ñàhá ñáyiú xii-ndí xícuèhé ñàhá-yu, te ío ndòho-ndí quidé-ndí chiuⁿ Yă Ndiõxí, te áma xídí-ndí te áma ñá túú xídí-ndí, te áma ñihí-ndí sá xéxí-ndí te áma ñá túú ñihí-ndí. ⁶ Te quide ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yă Ndiõxí, te quide cahnu iní-ndí cuèi nándi quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaa sá vâha nàcuáa chindee ñaha Espíritú Yă Ndiõxí xii-ndí, te ío ndisa iní-ndí cúú ñihí-ndí cue tnàha ñáyiú-ndí. ⁷ Te dànehé-ndí ñáyiú mee-ni tnũhu ndáá, te nchaa chiuⁿ quide-ndí te quide-ndí nàcuáa chindee ñaha Yă Ndiõxí xii-ndí, te cuendá sá quidé ndáá-ndí ndécú-ndí núú xíáⁿ ñihí ndéé-ndí dáquèe tíhú-ndí nchaa sá cuèhé sá dúhá. ⁸ Te dava ñáyiú quide nínu ñàhá-yu xii-ndí, te davá-yu tnúhu cuèhé tnúhu duha càháⁿ-yu xăhăⁿ-yu xii-ndí, te davá-yu xícáháⁿ váha-yu cuendá-ndí te davá-yu xícáháⁿ cuèhé-yu, te davá-yu càchí-yu sá dándàhú-ndí ñáyiú dico ñá ndáá chi càháⁿ ndáá-ndí. ⁹ Te davá-yu càchí-yu sá ñà túú xíní-yu ná ñáyiú cùu-ndí, te davá-yu càchí-yu sá xíní-yu yoo cùu-ndí, te davá-yu

cuiní-yu cahni ñàhá-yu xii-ndí dico vátá cáhni ñàha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiõxí, te cuèi ndòho-ndí dico ñá túú cùu-xi sá cùú-ndí. ¹⁰ Te cuèi ndìhú iní-ndí dico ñá túú dàña ndeé-ndí sá cùú-ndí iní-ndí, te cùu-ndí cue téé ndàhú dico sànu ichi-ndí vài ñáyiu ichi Yá Ndiõxí cuèndá ngúndecu váha-yu sá cuèndá-gá, te cuèi ñá túú ñá ndécú ndìhi-ndí dico ñá túú ñá cùmání xii-ndí.

¹¹ Te nchòhó ñáyiu ndècu ndìhi-í ichi Xítóhó Jesucristú ndécú ñúú Còrintú ío cùu iní ñàhá-ndí xii-ndo, te ñi yùhu ñi iní-ndí càháⁿ-ndí nchaa tnúhu càháⁿ-ndí sá cùú-xí-ndó. ¹² Te nchúhú chi ñi yùhu ñi iní-ndí cùú ñi ñàhá-ndí xii-ndo, dico nchòhó chi ñá túú dùcaⁿ quide-ndo sá cùú-xí-ndí. ¹³ Te yúhú càháⁿ ndàhú-í núú-ndó dàtná quidé ñⁿ téé cùu tátá òré càháⁿ ndìhi-dé cue déhe-dé sá ñi yuhu ñi iní-ndó cùu iní ñàhá-ndó xì-ndí dàtná quidé mèe-ndí cùú ñi ñàhá-ndí xii-ndo.

Nchoo cùu-o datná ñⁿ vehe Yá Ndiõxí

¹⁴ Te cue ñáyiu ñá túú sàndáá iní tnúhu Xítóhó Jesucristú, te vá cùú ñⁿnuu-ndo ndìhí-yu cada-ndo dàtná xíquidé-yu, chi dèⁿ cuu nchaa sá vǎha te dèⁿ cuu nchaa sá cuèhé sá dúhá, te ñúmí nchícanhii ndìhi niú chi ñá túú ñⁿ-ni cuu-xi. Te ducaⁿ sǎtnhá-xi cùu nchaa sá vǎha ndìhi nchaa sá cuèhé sá dúhá chi ñá túú ñⁿ-ni cuu-xi. ¹⁵ Te dèu-ni ducaⁿ ñá túú ñⁿ-ni cuu Xítóhó Jesucristú ndìhi sácúhna, te dèu-ni ducaⁿ ñá túú ñⁿ-ni cuu ñáyiu sàndáá iní ñàhá xì Xítóhó Jesucristú ndìhi ñáyiu ñá túú sàndáá iní ñàhá xì-gá. ¹⁶ Te dèu-ni ducaⁿ sǎtnhá tucu-xi

cùu vehe Yá Ndiöxí ndihí nchaa sá cächí ñáyiú cùu ndióxí ní cadúha cue téé ñuyíú-a, chi vá cúú quíhi ni ñⁿ xíáⁿ xití vehe-gá. Te nchoo cùu-o datná vehe Yá Ndiöxí Yaá ndécú túu andíu, chi mee-gã cächí-gá núú tütú-gá núú cächí-xi:

Yúhú vá cúmăní cundecu-í ndihí-yu nděni ní cuu na cundecú-yu,

te ðíu-ni yúhú cuu-í Ndiöxí-yu,

te mée-yu cuú-yu ñáyiú cùu cuendá-í.

Duha cächí-gá núú tütú-gá. ¹⁷ Te xíáⁿ nñu cächí tucu-gá íngá xichi núú tütú-gá núú cächí-xi:

Chí tá quèe tnuú nchaa ñáyiú ñá túú sàndáá iní ñáhá xì-í,

te vá cání ìní-ndó càda-ndo ni ñⁿ sá cuèhé sá dúhá,

te ducaⁿ te queheⁿ cuèndá ñáhà-í xii-ndo,

¹⁸ te yúhú cuu-í Tătá-ndó,

te nchòhó cuu-ndo cuè déhe ducuⁿ-í, ndihí cue déhe yoco-í,

duha cáháⁿ yúhú Yaá ío cànnyu cuu.

Duha cächí-gá núú tütú-gá.

7

¹ Te sá dúcáⁿ ïo váha cáháⁿ Yă Ndiöxí sá cúú-xí-ó nñu xíáⁿ cáháⁿ-í dóho nchòhó ñáyiú ío cùu iní-í sá dùuⁿ duuⁿ dañ-a-o nchaa sá cuèhé sá dúhá, chi nchaa xíáⁿ ñá túú cùu-xi sá vâha sá cúú-xí ìní-ó ndihí yiqui cuñú-ó, te cada-o nâcuáa tàú-xi cunduú nâcuáa cundáá-ó núú Yă Ndiöxí, te cada-o sã néhé-ó sã yíñùhu núú-gã.

Cue ñáyiú ñuú Còrintú quidé vâha-yu

² Te ni yùhu ni iní-ndó chì cúú ìní ñáhá xì-ndí, chi nchúhú vá yõo ñⁿ quíde úhú iní-ndí, te ni vâ yõo

ìⁿ dàcuíta nihnu-ndí, te ni vǎ yǒ ìⁿ dàndahú-ndí.
 3 Te sá dúhá càháⁿ-í te vá cání ìní-ndó sǎ ìⁿ cuéchi
 dàcaa-í díquí-ndó, chí dàtná sa ní cachí-í xii-ndo
 sǎ yǔhú ío cùu ìní ñáhà-í xii-ndo, te cuèi vitna
 ndècu-gá-ó ñùyíú-a àdi cuèi na cùú-ó dico òu-ni
 ducaⁿ cùu ìní ñáhà-í xii-ndo. 4 Te yúhú ío váha
 sàni ìní-í cuendá-ndó, te ducaⁿ ío váha càháⁿ-í
 cuendá-ndó, te ío ndècu ndihí-í tnúhu ndee ìní
 cuendá-ndó, te ío cùdí ìní-í sá cuendá-ndó cuèi
 nándi ndòho-í ndihí dava-gá-güedé ndécú-ndí.

5 Te nchúhú cútnàhá ní sáháⁿ-ndí distritú
 Macèdoniá, te ñá túú tnàhí ni ndètatú-ndí cuendá
 nchaa sá ñ yáhandi chí ío ní ndòho-ndí cuendá
 nchaa sá ñ quidé-yu, chí ío ní cuándeé ñáhǎ-yu
 xii-ndí, te ío ní sani ìní-ndí nùu nása-gá yáha-ndí
 ní cùu. 6 Dico Yá Ndiǒxí ní taxi-gá tnúhu ndee ìní
 xii-ndí òré ní quexìo té Títú núú ndécú-ndí, te
 òu-ni Yáá-áⁿ cùú-gǎ Yáá sǎñaha-gǎ tnúhu ndee
 ìní xii cue ñáyíu ndíhú ìní-xi. 7 Te ducaⁿ ñ taxi
 Yá Ndiǒxí tnúhu ndee ìní xii-ndí cuendá sá ñ
 quexìo té Títú núú ndécú-ndí, te ñá díú-ní sǎ
 cuendá ní quexìo-dé chí ní níhí tucu-ndí tnúhu
 ndee ìní cuendá ní cani-dé cuendú núú-ndí sá
 nchòhó ní sǎñaha-ndo tnúhu ndee ìní xii-dé, te
 ní cachí tnúhu-dé xii-ndí sá nchòhó ío cùní-ndó
 càháⁿ ndihí ñaha-ndo xii-ndí, te ní cachí tnúhu
 tucu-dé xii-ndí sá nchòhó ío ndíhú ìní-ndó cuendá
 nàcuáa cùu ndecu-ndo ní cuu, ndihí cuendá sá ío
 sàni ìní-ndó cuendá-í, te sá dúcáⁿ ndùu cuendú ní
 cani-dé núú-ndí nùu xíⁿ ío ní cudí ìní-í.

8 Te nchòhó ní ndíhú ìní-ndó cuendá tnúhu
 càháⁿ-í núú tütú sá ñ dáquíxì-í ndaha-ndo, te òré

ní níhì-í tnúhu sá ndìhú iní-ndó te tnaa-ni ní ndixi
 cuéchi iní-í sá dúcáⁿ nǐ quide-í te dātnùnì ñá túú-gǎ
 ní ndixi cuéchi iní-í. ⁹ Te vitna ní ndìhú iní-ndó, te
 xǎⁿ ní quide-xi ní ndixi cuéchi iní-ndó sǎ ñà túú
 quide váha-ndo ndècu-ndo ni cuu, te ní cudíí iní-í
 dico ñá díú cuendá sá nì ndìhú iní-ndó nǐ cudíí
 iní-í chi cuendá sá nǐ ndixi cuéchi iní-ndó, te ní
 ndìhú iní-ndó nàcuáa ní cuu váha iní Yǎ Ndiöxí,
 te xǎⁿ nǔu ní cuu-xi ìⁿ sá vǎha sá cúú-xí-ndó
 cuendá tnúhu ní cáháⁿ-í te ñá túú ní cùu-xi ìⁿ sá
 cuèhé sá cúú-xí-ndó. ¹⁰ Te nchoo nǔu na ndìhú
 iní-ó nàcuáa cuu váha iní Yǎ Ndiöxí, te ndixi cuéchi
 iní-ó te nǔu ñá túú quide váha-o ndècu-o, te sá
 dúcáⁿ quide-o te nàníhí tàhú-ó, te vá ndìhú iní-ó sǎ
 dúcáⁿ nǐ quide-o, te dava ñáyiu xǐndecu ichi cuèhé
 ichi duha ndìhú iní-yu dico ñá túú ndixi cuéchi
 iní-yu cuendá nchaa sá ñà túú vǎha quidé-yu, te
 sá dúcáⁿ quidé-yu te cuíta nihnú-yu. ¹¹ Te sá dúcáⁿ
 nǐ ndìhú iní-ndó nàcuáa ní cuu váha iní Yǎ Ndiöxí,
 te xǎⁿ nǔu ndùcu ndee-ndo quide-ndo nchaa
 nacuáa tàú-xi cunduu, te vitna nì yùhu nì iní-ndó
 càháⁿ-ndó sǎ quidé vǎha-ndo, te ío cùdééⁿ-ndó nǔú
 méé-ndó sǎ ñà túú quide váha-ndo ndècu-ndo ni
 cuu, te yùhú-ndó ndècu-ndo cuendá sá ñà túú
 quide váha-ndo ni cùu, te ío ní xúhuⁿ iní ñáhá-ndó
 xì-í, te ní ndúcú ndéé-ndó nǐ quide ndáá-ndó
 cuendá téé ndècuéchi ndècu ndìhì-ndo, te sá dúcáⁿ
 nǐ quide-ndo te xǎⁿ ní cutnùnì sá méé-ndó ñà
 túú cuèchi-ndo. ¹² Te ní cadúha-í tutú ní dáquíxì-í
 ndaha-ndo, te ní quide-ndo nàcuáa ní cáháⁿ-í, te
 sá dúcáⁿ nǐ quide-ndo xǎⁿ ní cutnùnì iní-ndó sǎ
 ïo cùu iní ñáhá-ndó xì-í. Te Yá Ndiöxí náhá-gǎ
 sá díú cuendá xǎⁿ ní dáquíxì-í tutú ndaha-ndo, te

ñá díú-ní cuendá sá sání ìní-í cuendá té ndècuéchi ndècu ndìhi-ndo, te ni ñà díú-ní cuendá ñáyiú ní dándìhú té ndècuéchi-áⁿ iní-xi ní càdúha-í tutú ní dáquíxi-í ndaha-ndo. ¹³ Te cuendá sá quidé vâha-ndo ndècu-ndo xǎⁿ cúú-xí tnùhu ndee ìní ndécú ndìhi-ndí.

Dico ñá díú-ní xǎⁿ chi tnàhá ío cùdíí ìní-ndí cuendá sá ío cùdíí ìní té Títú, te ducaⁿ cùdíí ìní-dé chi nchòhó ní sáñaha-ndo tnùhu ndee ìní xii-dé. ¹⁴ Te yúhú ñá túú cùcahaⁿ núú-í sá nì cáháⁿ váha-í cuendá-ndó núú tē Títú cútnàhá vátá quíxí-gǎ-dé núú ndécú-ndó, chi ní cutnùní ìní-dé sá ndàá càháⁿ váha-í nàcuáa quide-ndo datná cúú-xí sǎ ndàá nchaa tnúhu dàcuaha ñaha-í xii-ndo. ¹⁵ Te vitna ío-gá váha cùu ìní té Títú cuendá-ndó, chi ndàcu ìní-dé sá ncháá-ndó ío váha ní tñi-ndo nchàa tnúhu ní cáháⁿ-dé núú-ndó, te ndàcu tucu ìní-dé sá nǐ queheⁿ cuendá váha-ndo-dě, te ní dátúu-ndo núú-dě sá ío ní quiyùhú ìní-ndó sǎ vǎ ndácú-ndó càda-ndo nchaa nacuáa tàú-xi cunduu. ¹⁶ Te ío cùdíí ìní-í cuendá-ndó chi cùtnuní ndáá ìní-í sá ñà túú dàña ndeé-ndó quide-ndo nchaa nacuáa tàú-xi cunduu.

8

Ío váha cuu ìní-ó chìndee tnaha-o

¹ Te nchòhó ñáyiú ndècu ndìhi-ndí ichi Xítóhó Jesucristú càchí tnúhu-ndí xii-ndo nàcuáa quide ñaha Yá Ndiõxí xii cue ñáyiú xǎndecu ichi-gá ndécú dìstrítú Macèdoniá, chi ío chìndee ñaha-gá xii-yu cuendá sá quidé vâha-yu ndécú-yu. ² Te cuéi ndòho vihí-yu ndécú-yu dico ío-ni cùdíí ìní-yu, te cuendá xǎⁿ núu nǐ yùhu nǐ ìní-yu ní sacáⁿ tnáhǎ-yu díhúⁿ

să cúú-xí tnàha ñáyíú-yu, te ñá túú tnàhí ni xĩnduu díi-yu cuèi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tnáhă-yu, chi ní quide yica iní-yu ní sacáⁿ tnáhá-gă-yu, te yúhú càchí tnúhu ndáá-í xii-ndo să ñi yuhu ñi iní-yu ducaⁿ ñi quidé-yu. ⁴ Te ío ní cáháⁿ ndàhú-yu núú-ndĩ cuendá sá cuăha-ndĩ tnúhu sá tnáhá-yu chindèé-yu dava-gá cue ñáyíu cùu cuendá Yă Ndiöxí. ⁵ Te ñá díú-ní nàcuáa ní sani iní-ndĩ ní quidé-yu, chi ní xídó-gă-yu ní quide váha-yu, te ducaⁿ chi mèé-yu ní sani iní-yu sá cáďă-yu nchaa nàcuáa cuiní Yă Ndiöxí, te dătnùní ducaⁿ te ní cachí-yu sá cúú càďă-yu nchaa nàcuáa na cũñaha-ndĩ xií-yu. Te ducaⁿ ñi quidé-yu chi ducaⁿ ñi cuiní mée Yă Ndiöxí cunduu. ⁶ Te sá dúcáⁿ ñi quide ñáyíu-áⁿ nũu xiăⁿ cəháⁿ ndàhú-ndĩ núú tẽ Títú sá quíxí tùcu-dé núú ndécú-ndó cuendá dăxínu cava-dé chiúⁿ sá sà ní ngũíta-dé quidé-dě dătăcá-dé dîhúⁿ să sà ní ngũíta-ndo sàcáⁿ tnáhá-ndó, te ducaⁿ quide-ndo chi cùndahú iní-ndó tnàha ñáyíu-ndo. ⁷ Te nchòhó cúú-ndó ñáyíu ío ngòdónúú quide nchaa sá văha, te ío váha sàndáá iní-ndó Xítóhó Jesucrìstú, te ío váha cùtnuní iní-ndó nàcuáa cəháⁿ tnúhu-gá, te ío váha dăcuaha-ndo ñáyíu tnúhu-gá, te ío ndùcu ndee-ndo quide-ndo mee-ñi sá văha, te ducaⁿ ïo cùu iní ñáhá-ndó xii-ndĩ, te sá dúcáⁿ quide-ndo núu xiăⁿ cəháⁿ ndàhú-í núú-ndó să ngòdó núú-gă-ndó càďă-ndo sá cúú-xí tnàha ñáyíu-ndo.

⁸ Dico yúhú ñá túú tàuchiuⁿ-í sá dúcáⁿ càďă-ndo, chi cuendá-ñi sá cəchí tnúhu-í xii-ndo nàcuáa quide dava-gá cue ñáyíu ndècu ichi Xítóhó Jesucrìstú,

chi cue ñáyiú-áⁿ ni yùhu ni iní-yu quidé-yu sá vâha sá cúú-xí tnàha ñáyiú-yu, te cächí tnúhu-í xii-ndo nàcuáa quidé-yu cuendá cutnùní nùu nása cada-ndo nùu ndisa sá cúú iní-ndó cuè tnaha ñáyiú-ndo. ⁹ Te nchòhó sa xini-ndó sã Xitohó Jesucristú ío cùndahú iní ñáhá-gã xii-o, te ío váha ndècu-gá ní cùu te ní quixi-gá ñuyíú-a ní guide váha ñaha-gã xii-o, te ñuyíú-a ñá túú ní xĩndecu váha-gá, te ducaⁿ ñi quixi-gá ñuyíú-a cuèi ñá túú ní xĩndecu váha-gá cuendá sá nchóó ngũndecu váha-o nùú ndécú-gã.

¹⁰ Te na cächí tnúhu-í xii-ndo nàcuáa sàni iní-í. Chìuⁿ sá ñi yuhu ni iní-ndó ñi ngũíta-ndo quide-ndo cuía ñi yáha chi cùu-xi sá vâha sá cúú-xí-ndó nùu na dàxínu cava-ndo. ¹¹ Te dàtná-ni ni yùhu ni iní-ndó ñi tausaha-ndo chìuⁿ-áⁿ te ducaⁿ-ni ñi yuhu ni iní-ndó dàxínu cava-ndo, te cacáⁿ tnáhá-ndó sã ndécú ndihí-ndo nacuéa xito mee-ndo ndacu-ndo. ¹² Te nùu nchòhó ni yùhu ni iní-ndó càcáⁿ tnáhá-ndó sã xító mèe-ndo ndacu-ndo ña, te cùu váha iní Yã Ndiõxí, chi mee-gã sa nàha-gá nása ndècu-o te ndùu vétú-ni iní-gá.

¹³ Te sá dúhá ndùu tnúhu càháⁿ-í te vá cání iní-ndó sã yùhú cuiní-í sá nchòhó ndoho-ndo cùndecu-ndo te dava-gá-yu ngũndecu váha-yu sá cuendá-ndó. ¹⁴ Te vitna ndècu ndee iní-ndó nàcuáa ndacu-ndo chĩndee-ndo cue ñáyiú xini ñuhu, te nduu ñá túú ndècu ndee iní-ndó te cue ñáyiú-áⁿ chĩndee ñáhá-yu xii-ndo te nùu ndècu ndee iní-yu, te ducaⁿ te ñi nchòhó ñá túú ñá cumání xii-ndo te ñi cuè ñáyiú-áⁿ ñá túú ñá cumání xií-yu. ¹⁵ Te ducaⁿ te quee ndáá-xi nàcuáa càháⁿ-xi núú tütú Yã Ndiõxí núú cächí-xi: “Cue ñáyiú ío vai sá ni ñihí ñá túú ní

cùu sobrá xií-yu, te cue ñáyiú sacú ní níhí ñá túú ní cùmání xií-yu”, duha càchí-xi núú tùtú-gá.

Té Títú ndihí cue té cùndihí-dé

16 Te ndàcáⁿ táhù-í núú Yă Ndiöxí chi mee-gă ní quide sá tē Títú ío ñùhu iní ñáhá-dě xii-ndo dàtná ñùhú iní ñáhà-í xii-ndo. 17 Te yúhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñá díú mèe-ni sá dúcáⁿ ñí xáhaⁿ-í xii-dé quixi coto ñaha-dě xii-ndo, chi mee-dě cúdǐ^í tnàhí iní-dé quixi coto ñaha-dě xii-ndo.

18 Te tendaha-ndǐ^í ñⁿ tée ndècu ndihí-o ichi Xítohó Jesucristú quixi-dé ndihí té Títú, te tée quixi ndihí té Títú-áⁿ cúú-dě ñⁿ tée ío váha càháⁿ cue ñáyiú xǐndecu ichi Xítohó Jesucristú cuendá-dé cuendá sá ïo váha quide-dé chiúⁿ Xítohó Jesucristú càháⁿ-dé tnúhu-gá tnúhu sá càháⁿ nàcuáa naníhí tǎhú-ó. 19 Te cue ñáyiú xǐndecu ichi Xítohó Jesucristú ñá díú-ní sǎ càháⁿ váha-yu cuendá-dé, chí tnàhá ní cáxi ñáhá-yu xii-dé cuendá sá cáca cùu ndihí ñaha-dé xii-ndí chindee ñaha-dé tacá sá cúú-xí ñáyiú ndàhú, te quide-ndí chiúⁿ-a cuendá ío cuu càhnu Yă Ndiöxí, te cue ñáyiú cutnùní iní-yu sá nchòhó ñí yùhu ñí iní-ndó quide-ndo nchaa sá vǎha sá cúú-xí cuè tnaha ñáyiú-ndo. 20 Te cuení-ndí sá vǎ càháⁿ cuèhé ñáyiú cuendá nàcuáa quide-ndí ndihí sá ngǎutnàha sá cúú-xí cuè tnaha ñáyiú-o, te ío vǎi cuu-xi. 21 Chi ndùcu ndee-ndí quidé-ndǐ^í nàcuáa cáháⁿ váha Xítohó Jesucristú cuendá-ndí, te quide tucu-ndí nàcuáa cáháⁿ váha ñáyiú sá quidé vǎha-ndí.

22 Te tendaha tùcu-ndí ingá tucu tée ndècu ndihí-o ichi Xítohó Jesucristú quixi-dé ndihí

cue téé úú quixi coto ñaha xii-ndo, te téé quixi ndihí-güedé-áⁿ ñí cuu vai xito quide-dé nàcuáa cutnùní iní-ndí sá ïo ndùcu ndee-dé quidé-dě sá vǎha, te vitna ío-gá cuìní-dé cada-dé sá vǎha vitna quixi-dé núú ndécú-ndó, chí cùtnuní ndáá iní-dé sá cúú-ndó cuè ñáyiú quide váha. ²³ Te cǎchí tnúhu-í xii-ndo sǎ tǎ Títú cúú-dě ñⁿ téé cùndihí-í quidé-ndí chiuⁿ Xítóhó Jesucrístú, te tnáhá-dé cúú-dě ñⁿ téé xínu cuechi núú-ndó cǎháⁿ-dé tnúhu-gá. Te cǎchí tnúhu tucu-í xii-ndo cuèndá cue téé úú quixi ndihí-dé, chí cue téé-áⁿ cúú-güedě cue téé tendaha cuè ñáyiú xǐndecu ichi Xítóhó Jesucrístú quixi coto ñaha xii-ndo. Te cue téé-áⁿ quidé-güedě nàcuáa cachí ñáyiú sá ïo cǎhnu cuu Xítóhó Jesucrístú. ²⁴ Te chí cǎdá sǎ cúú iní ndisa-ndo-güedě cuèndá ducaⁿ na cùtnuní iní nchaa dava-gá ñáyiú xǐndecu ichi Xítóhó Jesucrístú sá ndáá ndisa ducaⁿ quide-ndo, te ducaⁿ cùtnuní iní-yu sá ndáá ndisa quide váha-ndo dàtná cǎháⁿ-ndí cuèndá-ndó sǎ quidé vǎha-ndo.

9

Cuèndá sá ngǎutnàha sá cúú-xí cuè ñáyiú xǐndecu ichi Xítóhó Jesucrístú

¹ Te cuèndá sá ngǎutnàha sá cúú-xí cuè ñáyiú ndècu ichi Xítóhó Jesucrístú ñá túú-gǎ xíní ñùhu-xi cachí tnúhu-í xii-ndo nǔú tütú-a nàcuáa cada-ndo, ² chí sa cùtnuní iní-í sá ïo cuìní-ndó chǐndee-ndó-yu. Te ducaⁿ-ni ïo váha cǎháⁿ-í cuèndá-ndó nǔú ñáyiú xǐndecu ichi Xítóhó Jesucrístú ndécú dìstrítú Macèdoniá, te xǎhaⁿ-í xii-yu sá nchòhó ñáyiú xǐndecu ichi Xítóhó Jesucrístú ndécú dìstrítú Acáyá sa ní cuu ñⁿ cuíá ducaⁿ cuìní-ndó cǎcáⁿ tnáhá-ndó

să cúú-xí cuè ñáyiú ndàhú ndécú ìchi-gá. Te vài cue ñáyiú distritú Macèdoniá cuìní-yú cacáⁿ tnáhă-yú sá cúú-xí cuè ñáyiú ndàhú ndécú ìchi Xítóhó Jesucristú cuèndá sá ñí ñíhî-yú tnúhu sá nchòhó ío cuìní-ndó dùcaⁿ cada-ndo. ³ Te cuèndá sá sání iní-ndó càda-ndo xíăⁿ tendaha-î cue téé ndècu ndîhi-o ichi Xítóhó Jesucristú quixi-güedé núú ndécú-ndó cuèndá dâtúha ñaha-güedé xii-ndo, cuèndá sá vă quée ndèhnde-í núú ñáyiú sá ñí cáháⁿ váha-í cuèndá-ndó, te ducaⁿ cùndecu túha ndisa-ndo dàtná sa ñí cáháⁿ-í núú-yú. ⁴ Chi na cuáháⁿ ndèé quixi-í ndîhi ìⁿ ũú cue ñáyiú distritú Macèdoniá núú ndécú-ndó te quiní-yú sá ñà túú ndècu túha-ndo, te cucahaⁿ núú-í núú-yú sá ñí cáháⁿ váha-í cuèndá-ndó te núú ñà túú ndècu túha-ndo, te tnáhá-ndó cùcahaⁿ núú-ndó. ⁵ Te xíăⁿ núú ñí sani iní-í sá văha-gá codonùu cue téé ndècu ndîhi-o ichi Xítóhó Jesucristú quixi coto ñaha-güedé xii-ndo cuèndá chindee ñaha-güedé tacá sá ñí sani iní-ndó càcáⁿ tnáhá-ndó cuèndá sá cùndècu túha-xi, te cuu-xi dàtná ìⁿ táhú sá ñí quene cuu iní méé-ndó càcáⁿ tnáhá-ndó sá cúú-xí cuè tnaha ñáyiú-ndo. Te ducaⁿ te vă yõo cani iní-xi quesàhá-yú sá nchũhú ñí quide yica-ndî ducaⁿ ñí sacáⁿ tnáhá-ndó.

⁶ Te nchòhó sa xìní-ndó sá ñáyiú na chîhi vai tatá te vài ñíhî-yú cùu, te cue ñáyiú na chîhi sacú tatá te sacú ñíhî-yú cùu. Ducaⁿ sãtnahá-xi cùu ñáyiú sàcáⁿ tnáhá sá cúú-xí tnàha ñáyiú-yú. ⁷ Te ìⁿ ìⁿ-ndo càcáⁿ tnáhá-ndó nàcuáa quène cuu iní méé-ndó, te ío váha cuu iní-ndó dùcaⁿ cada-ndo te vă cádá-ndó cuèndá-ñi sá quidé yica ñaha ñáyiú xii-ndo, chi Yá Ndiõxí cúú văha iní-gá núú nchàa

ñáyiú cùdíí ìní sàcáⁿ tnáhá sǎ cúú-xí cuè tnaħa ñáyiú-xi. ⁸ Te Yá Ndiǒxí ndacu-gá chindee ñàħa-gá xii-ndo nàcuáa cundecu váħa-ndo, chi ðiu-gá cada te ñíhí-ndó nchàa núú sǎ xíní ñùhu-ndo cundecu ndihí-ndo, te ñá túú tnàhí-gá ná cumání xii-ndo, te mee-gǎ chindee ñàħa-gá xii-ndo ñíhí-ndó ïo vǎi cundecu ndihí-ndo cuendá ducaⁿ chìndee-ndo cue tnaħa ñáyiú-ndo. ⁹ Te núú tùtú Yǎ Ndiǒxí càchí-xi ì[#]n xichi:

Ìⁿ ñáyiú ïo vǎi sǎ ñí sǎñàħá-yu xii ñáyiú ndàhú, te sǎ ñí quide ñáyiú-áⁿ ñí cuu-xi sǎ vǎħa sǎ vǎ yǒo cùnaa.

Duha càchí-xi núú tùtú-gá. ¹⁰ Te mee Yǎ Ndiǒxí táxí-gǎ nchaa sǎ cúú tàtá nchaa nchòhó ñáyiú xítu nándí sǎ xítú cuendá cuu sǎ cúú nchìto-ndo, te ðiu-gá cada te ïo vǎi sǎ ñíhí-ndó cundecu ndihí-ndo, te ducaⁿ ïo-gá vǎi sǎ vǎħa cada-ndo sǎ cúú-xí cuè tnaħa ñáyiú-ndo. ¹¹ Te Yá Ndiǒxí taxi-gá vǎi núú sǎ cùndècu ndihí-ndo cuendá ducaⁿ ñí yuhu ñí ìní-ndó vǎi cuáñaha-ndo sǎ cúú-xí tnàħa ñáyiú-ndo. Te cuendá nchaa sǎ sàcáⁿ tnáhá-ndó quèheⁿ cuendá-ndí cuu xii tnàħa ñáyiú-ndo, te cue ñáyiú-áⁿ ïo ndacáⁿ táhǔ-yu núú Yǎ Ndiǒxí cuendá sǎ dúcáⁿ sàcáⁿ tnáhá-ndó sǎ cúú-xí-yu. ¹² Te sǎ dúcáⁿ quide-ndo sacáⁿ tnáhá-ndó sǎ cúú-xí cuè ñáyiú cùu cuendá Yǎ Ndiǒxí, te ñáyiú-áⁿ ñà túú-gǎ ná cumání xíí-yu, te ïo ndacáⁿ táhǔ-yu núú Yǎ Ndiǒxí sǎ dúcáⁿ quide-ndo. ¹³ Te ñáyiú-áⁿ cutnùní ìní-yu sǎ nchòhó quidé-ndó sǎ sàndáa ndisa ìní-ndó tnùhu Xítóhó Jesucrístú, te cuendá xíǎⁿ te ñáyiú-áⁿ chiñùhú-yu Yá Ndiǒxí, te cuendá sǎ dúcáⁿ ñí yuhu ñí ìní-ndó sàcáⁿ tnáhá-ndó sǎ cúú-xí-yu ndihí sǎ cúú-xí nchàa dava-gá ñáyiú,

te cachí-yu sá ïo càhnu cuu Yá Ndiöxí. ¹⁴ Te ñáyi-u-áⁿ cãháⁿ ndihí-yu Yá Ndiöxí cuendá-ndó, te ío cuu váha iní ñáhã-yu xii-ndo cuendá sá Yã Ndiöxí chindèe ñaha-gá xii-ndo quide-ndo sá vãha sá cúu-xí-yu ndihí dava-gá ñáyi-u. ¹⁵ Te ío ndàcáⁿ táhú-ó núu Yã Ndiöxí cuendá sá ñí taxi-gá sá ïo váha ndècu ndihí-o, te ni ñã cútnùní iní-ó nãsa cunduu tnúhu cáháⁿ-ó cuendá sá vãha ní taxi-gá.

10

Té Pãblú ndécú ndihí-dé tnúhu ndee iní sá càháⁿ-dé tnúhu Xítoho Jesucrístú

¹ Te Xítoho Jesucrístú ío càhnu iní-gá, te cùndahú iní ñáhã-gã xii-o chindèe ñaha-gá, núu xíãⁿ yúhú té Pãblú ducaⁿ quide-í càháⁿ ndàhú-í núu-ndó nàcuáa cada-ndo. Te dava-ndo càchí-ndó sã yùhú ío ndàhú iní-í òré ndécú ndihí ñaha-í xii-ndo, te òré ñã túú ndècu ndihí ñaha-í xii-ndo te ío ñí cáà-í. ² Te càháⁿ ndàhú-í núu-ndó sã cáda-ndó nàcuáa vá càháⁿ ñí-í núu-ndó òré quixi-í quixi coto ñaha-í xii-ndo. Te cuìní-í sá ndihí tnúhu ñí iní-xi cáháⁿ ndihí-í cue ñáyi-u càchí sá ñí-ni cuu-í ndihí cue ñáyi-u ñã túú sãndáá iní tnúhu Xítoho Jesucrístú. ³ Te nchúhú cùu-ndí cue tée ñuyú-a, dico ndècu ndee-ndí quidé-ndí nàcuáa ndàcu-ndí dáquèe tíhú-ndí nchaa sá cuèhé sá dúhá, dico ñã díú mèe-ndí ducaⁿ ndàcu-ndí quidé-ndí, ⁴ te ni ñí sá ío ñuyú-a ñã túú chindèe ñaha-xi, chi mee Yã Ndiöxí chindèe ñaha-gá xii-ndí dáquèe tíhú duuⁿ-ndí nchaa núu sã cuèhé sá dúhá. ⁵ Te xíãⁿ núu ñíhí-ndí tnúhu càháⁿ-ndí sàdí-ndí yuhu cue

ñáyiú càháⁿ tnúhu sá ñà túú cùu váha iní Yă Ndiöxí, ñáyiú xĩquide nínu mee-xi càchí sá ñà túú nàndíhi tnúhu-gá. Te quide-ndí sá ñáyiú-án quindáá iní-yu tnúhu Xítohó Jesucristú. ⁶ Te nchúhú sa ndècu túha-ndí sá dáquètíhú-ndí cue ñáyiú ñá túú cuíní cada nàcuáa cuíní Xítohó Jesucristú, dico díhna-gá xíní ñùhu-xi sá ncháá nchòhó ñáyiú cuíní cada nàcuáa cuíní-gá cundáá-ndó.

⁷ Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuendá-ndí. Chi núu cùtnuní ndáá iní-ndó sã cúú-ndó cuendá Xítohó Jesucristú, te diu-ni ducaⁿ taú-ndó càni iní-ndó cuendá-ndí tucu. ⁸ Te Xítohó Jesucristú ní taxi-gá tnúhu ndee ìní ndécú ndíhi-ndí sá dánèhé ñáhá-ndí xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sã dánèhé ñáhá-ndí xii-ndo nàcuáa cuita nihnu-ndo, te cuèi na chido-gá-í cáháⁿ-í cada nínu-í mée-í cuendá tnúhu ndee ìní ní taxi Xítohó Jesucristú ndécú ndíhi-ndí, dico vá cúcàhaⁿ núu-í chi càháⁿ ndáá-í. ⁹ Te ñá túú cuíní-í sá nchòhó caní iní-ndó sã yùhú dáyùhú ñáhà-í xii-ndo nàcuáa ndùu tnúhu càháⁿ-í núú tütú-í. ¹⁰ Te dava-ndo càchí-ndó sã ténàá ñáhà-í xii-ndo núú tütú-í, te mee-ni tnúhu càhnu sá ïo cùnuu cuu-xi, te càchí tucu-ndo sã òré ndécú ndíhi ñaha-í xii-ndo te ñá túú càa-í sá cúú-í ìⁿ téé cùu váha cùu dico iní-ndó, te càchí tucu-ndo sã ñà túú tnàhá iní-ndó nàcuáa quide-í òré dácuàha ñaha-í xii-ndo. ¹¹ Te nchòhó ñáyiú ducaⁿ càháⁿ cada cuendá váha-ndo sã dàtná-ni càháⁿ-ndí núú tütú-ndí diu-ni ducaⁿ quide-ndí òré ndécú ndíhi ñaha-ndí xii-ndo.

¹² Te nchúhú, vá cúú tnàhí cáháⁿ-ndí sá ìⁿ-ni

cuu-ndí ndihí cue ñáyiú càháⁿ váha cuèndá méé-xí, chi ñáyiú-áⁿ sání iní-yu ná cúú sǎ váha te quidé-yu te xǎⁿ càchí-yu sá ío váha quidé-yu, te càchí-yu sá quidé váha-gá-yu dàcúúxí tnàha ñáyiú-yu, te sá dúcáⁿ càháⁿ-yu te quidé-yu dàtná quidé cuè ñáyiú ñá túú tnàhí cùtnuní iní-xi. ¹³ Te dico nchúhú ñá túú xidó-ndí càháⁿ váha-ndí cuèndá-ndí, chi càháⁿ váha-ndí cuèndá-ndí dico nàcuáa ndùu chiuⁿ ní taxi Yá Ndiõxí càháⁿ-ndí, chi mee-gǎ ní cachí-gá ndèè není sáá-ndí càháⁿ-ndí tnúhu-gá, te ní sáá-ndí ndéé ñuú-ndó càháⁿ-ndí tnúhu-gá. ¹⁴ Te vitna ndècu ndihí-ndí tnúhu ndee iní sá tnàhá nchòhó cuu càháⁿ ndihí ñaha-ndí xii-ndo, chi díhna-gá nchúhú ní quixi-ndí ní càháⁿ-ndí tnúhu Xítohó Jesucrístú ñuú-ndó, tnúhu sá càháⁿ nàcuáa naníhí tàhú-ó. ¹⁵ Te nchúhú ñá túú quide cahnu-ndí méé-ndí cuèndá chiuⁿ quide dava-gá-güedé que-saha-ndí sá chíúⁿ mèe-ndí cúú-xí. Te cuení-ndí sá nchòhó cuita quindáá-gá iní-ndó Xítohó Jesucrístú, te ducaⁿ te níhí-gǎ-ndí nàcuáa cada-ndí chiuⁿ-gá nchaa dava-gá xichi núú ñí cachí-gá cada-ndí chiuⁿ-gá. ¹⁶ Chi càháⁿ-ndí tnúhu-gá tnúhu sá càháⁿ nàcuáa naníhí tàhú-ó, te yáha-gá-ndí ñuú-ndó quíhíⁿ-ndí nchaa dava-gá xichi càháⁿ-ndí, te vá cádá cahnu-ndí méé-ndí cuèndá chiuⁿ sá sà ní quide dava-gá-güedé.

¹⁷ Te cue ñáyiú cuení cada cahnu mee-xi te vá dúcáⁿ càdá-yu, chi mee Xítohó Jesucrístú ná càda cahnú-yu-gá. ¹⁸ Te nchaa ñáyiú na càháⁿ váha Xítohó Jesucrístú cuèndá-yu, ñáyiú-áⁿ cúdíú-yu núú-gǎ, te ñá túú cùdíú-yu núú-gǎ cuèndá sá càháⁿ

váha-yu cuendá méë-yu.

11

Cuendá té Păblú ndihî cuendá cue téé cāchî sá cāháⁿ tnúhu Yá Ndiǒxî te ñá ndáá

¹ Te cūnî-î sá nchòhó cada ndee iní-ndó cūndedóho-ndo tnúhu na cāháⁿ-î, chi cāháⁿ-î dàtná cāháⁿ cue ñáyiú ñá túú cūtnunî iní-xi, te cuèi nása-gá ná cūnduu tnúhu cāháⁿ-î dico chí cadá ndèe iní cūndedóho-ndo. ² Chi yúhú ío ñúhu iní ñáhà-î xii-ndo dàtná ñúhú iní ñáhá mèe Yá Ndiǒxî xii-o, te ní cāháⁿ-î tnúhu Xítohó Jesucristú núú-ndó nūu xíáⁿ ní tnahá tnúhu-ndo ndihî-gá vitna, te sá dúcáⁿ ñî quide-î te cada iní-ndó sá yúhú cúú-î dàtná ñîⁿ téé xìca ndáhú te nchòhó cúú-ndó dàtná ñîⁿ xíchî cuéchî, te Xítohó Jesucristú cúú-gă dàtná ñîⁿ téé tnándaha ndihî xíchî cuéchî-ăⁿ. Te ducaⁿ càda iní-ndó chí na sàá nduu te yúhú na càni cuendá ñáhà-î xii-ndo nūú Xítohó Jesucristú, te cuu-ndo ñáyiú vá cūndècu tnahî-gá cuéchi-xi. ³ Te yúhú-î sá sàcúíhná dandàhú ñáhá-xí xii-ndo vá cání-gă iní-ndó cànchicúⁿ nihnu-ndo ñî yuhu ñî iní-ndó ìchi Xítohó Jesucristú dàtná nchìcúⁿ nihnu-ndo vitna. Te yúhú-î ná yáha-ndo dàtná ní yáha tá Èvá, chi sàcúíhná ñî nduu-xi cóo ñî dándàhú ñáhá-xí xii-xi, chi sàcúíhná-ăⁿ ío váha ní xito-xi nàcuáa ní quide-xi ní dándàhú-xi tá Èvá-áⁿ. ⁴ Te nchòhó, quidé ndèe iní-ndó sàcūndedóho-ndo nchàa tnúhu cāháⁿ cue téé cāháⁿ ingá núú tnúhu cuendá Jèsús tnúhu sá ñà túú dānehé ñáhá-ndǐ xii-ndo, te quide ndee tucu iní-ndó ndèdóho-ndo dānehé ñáhá-güedē xii-ndo cuendá ingá espíritú, te ñá díú cuendá Espíritú Yă Ndiǒxî sá ñî ngūndecu ndihî-ndo

dànehé ñáhá-güedě xii-ndo, te quide ndee tucu iní-ndó ndèdóho-ndo dànehé ñáhá-güedě xii-ndo ìngá núú tnùhu sá cächí-güedé cäháⁿ nàcuáa naníhí tàhú-ndó, te ñá díú nàcuáa ndùu tnùhu sá ni sàndáá iní-ndó cuendá naníhí tàhú-ndó cäháⁿ-güedé. ⁵ Te cue téé ducaⁿ cäháⁿ-áⁿ cächí-güedé sá Yă Ndiôxí ní tendaha ñàha-gá xii-güedé xícá cùu-güedé cäháⁿ-güedé tnùhu-gá te ío cùnuu-güedé, dico ñá ndàá sá cäháⁿ-güedé tnùhu-gá. Te yúhú cùtnùní iní-í sá cuè téé-ăⁿ ñá túú cùnuu-güedé dàtná cùnùu yúhú. ⁶ Te cuèi ñá túú cäháⁿ-í dàtná cäháⁿ cue téé ío váha sáá díquí-xi dico ío váha cùtnuní iní-í cuendá nchaa sá dácuàha-í, te yúhú sa quide-í nàcuáa cutnùní iní-ndó sã ïo váha cùtnuní iní-í nàcuáa ndùu nchaa tnùhu cäháⁿ-í.

⁷ Te cudana te sàni iní-ndó sã yúhú ñá túú ní quide váha-í sá nĩ quide-í mée-í dàtná ìⁿ téé ío ndàhú iní-xi, chi ñá túú ní xícáⁿ-í yáhu-í núú-ndó cuendá sá nĩ cäháⁿ-í tnùhu Yă Ndiôxí tnùhu sá cäháⁿ nàcuáa naníhí tàhú-ó nùú-ndó. ⁸ Te ní queheⁿ-í díhúⁿ nĩ taxi dava-gá cue ñáyíu ndècu ichi Xítóhó Jesucristú, te díhúⁿ-ăⁿ nĩ dándóñùhu-í ní saaⁿ-í nchaa sá nĩ xini ñùhu-í cùtnàhá ní cäháⁿ-í tnùhu Xítóhó Jesucristú núú-ndó. ⁹ Te cùtnàhá ní xíndecu ndìhi ñaha-í xii-ndo te áma ní xóo cumání sã xíní ñùhu-í, te ñá túú nã ní xícáⁿ-í núú ni ìⁿ-ndo. Chi cue ñáyíu xíndecu ichi Xítóhó Jesucristú ndécú distritú Macèdoniá ní quixí-yu ní taxi-yu sá cúmăní xii-í, te ñá túú tñàhí ni dàsatú iní ñáhá-í xii-ndo cãcáⁿ-í núú-ndó nùu ná cúú sã xíní ñùhu-í, te ñíu-ni ducaⁿ càda-í. ¹⁰ Te ñíu-ni duha cäháⁿ váha-í cuendá-í te ni ìⁿ cue ñáyíu distritú Acăyá vá ñìhí-yu tnùhu cùñàhá-yu xii-í cuendá cadí-yu yuhu-í. Te mee

Xítóhó Jesucrístú náhá-gă sá ndàá càháⁿ-í dàtná càháⁿ ndáá méé-gă. ¹¹ Te cudana te sàni iní-ndó sã sà dúhá càháⁿ-í te ñá túú cùu iní ñáhà-í xii-ndo, dico ñáhà chi mee Yă Ndiöxí náhá-gă sá yùhú ío cùu iní ñáhà-í xii-ndo.

¹² Te nàcuáa-ni ta quide-í véxi te ðiu-ni ducaⁿ càda-í cuendá sá cuè téé cuení cada nínu mee-xi cächí sá ìⁿ-ni cuu ndihí ñaha-güedé xii-í vá ñihí-güedé tnúhu cáháⁿ-güedé cachí-güedé sá ìⁿ-ni chiuⁿ quide ndihí ñaha-güedé xii-í. ¹³ Te cue téé-áⁿ cächí-güedé sá Yă Ndiöxí ní tendaha ñaha-gá xii-güedé xícá cùu-güedé càháⁿ-güedé tnúhu-gá dico ñá ndàá, chi mee-ni dândahú-güedé ñáyiu ndihí tnúhu càháⁿ-güedé, te quide-güedé dàtná quidé cuè téé càháⁿ tnúhu Xítóhó Jesucrístú dico ñá ndáá sá cúú-güedé cue téé càháⁿ tnúhu-gá. ¹⁴ Te vá cúññhu-o sã dúcáⁿ quide cue téé-áⁿ, chi mee sàcuíhná quidé-xí sã cúú-xí dàtná ìⁿ espíritú xínú cuèchi núú ío váha càa ndecu Yă Ndiöxí dico ñá ndáá sá xínú cuèchi-xi xíáⁿ. ¹⁵ Te xíáⁿ vá cúññhu-o sã cuè téé xínu cuechi núú-xi quide-güedé sá cúú-güedé cue téé quide váha chi ñá ndáá sá quidé váha-güedé chi dândahú-güedé ñáyiu. Te nàcuáa ndùu nchaa sá quidé-güedé te ducaⁿ nàcháhu-güedé núú Yă Ndiöxí.

Té Păblú ío ndòho-dé cuendá sá cúú-dě téé càháⁿ tnúhu Xítóhó Jesucrístú

¹⁶ Te yúhú càháⁿ tucu-í dóho-ndo sã vă cání iní-ndó sã yùhú cúú-í ìⁿ téé càháⁿ lùcú càháⁿ duha, te núu dava-ndo dùcaⁿ sani iní-ndó dico chí cádá ndéa iní cundedóho-ndo tnúhu na càháⁿ-í cuendá ducaⁿ tnáhà-í cada nínu-í méé-í. ¹⁷ Te vitna na càháⁿ-í dàtná càháⁿ ìⁿ téé ñá túú cùtnuní iní-xi,

chi tnúhu cáháⁿ-í ñá túú ìⁿ-ni cuu-xi ndihì tnúhu Xítohó Jesucristú, chi vitna cáháⁿ-í nàcuáa cada nínu-í méè-í. ¹⁸ Te ío cuéhé ñǎyiu quide nínu mee-xi cuendá nchaa sá ío ñuyúú-a te xǎⁿ nǔu tnàhá-í cuíní-í cada nínu-í méè-í. ¹⁹ Chi cùtnuní sá nchòhó quidé ndèe iní-ndó sàcúndedóho-ndo nchàa tnúhu càháⁿ cue tée càháⁿ lùcú càháⁿ duha, te ducaⁿ quide ndee iní-ndó sàcúndedóho-ndo tnúhu càháⁿ-güedé chi càchí-ndó sǎ ìo túha-ndo. ²⁰ Te nchòhó, quide ndee iní-ndó tnì-ndo nchaa tnúhu càháⁿ cue tée quide yica ñaha xii-ndo sá cúnú cuèchi-ndo núú-güedé, te xìcáⁿ-güedé nándì sá xìcáⁿ-güedé núú-ndó, te tàxi tnuní ñáhá-güedé xii-ndo, te quide-güedé sá ìo cùnuyu-güedé ndécú ndìhì ñaha-güedé xii-ndo, te càniha-güedé xii-ndo, te cuèi nchaa xǎⁿ quidé ñaha-güedé xii-ndo dico quide ndee-ni iní-ndó. ²¹ Te nchòhó càchí-ndó sǎ cúú-ndì cue tée ñá túú ní cùyì cada nándì sá cáda, te ndáa chi ñá túú ìⁿ-ni cuu-ndì ndihì cue tée ducaⁿ xǐquide.

Dico núu cue tée-áⁿ cùyì-güedé quidé ñinu-güedé méé-güedé, te tnàhá-í cùyì-í ducaⁿ càda-í. Te sá dúhá càháⁿ-í te càháⁿ-í dàtná ìⁿ tée ñá túú cùtnuní iní-xi. ²² Te núu quide cahnu-güedé méé-güedé cuendá sá càháⁿ-güedé tnúhu hèbreú, te yúhú tucu ñiu-ni tée càháⁿ tnúhu hèbreú cúú-í, àdi quide cahnu-güedé méé-güedé cuendá sá cúú-güedé cue tée israél, te yúhú tucu tnàhá-í cúú-í tée israél, àdi quide cahnu-güedé méé-güedé cuendá sá cúú-güedé ñaní tnáhá ndì Àbrahám, te tnàhá yúhú cúú-í ñaní tnáhá ndì Àbrahám tucu. ²³ Àdi quide cahnu-güedé méé-güedé cuendá sá sání iní-güedé

sá díú nũ Xítohá Jesucrístú xínú cuèchi-güedé, dico yúhú ío-gá xínú cuèchi ndisa-í núú-gã. Te sá dúhá quide cahnu-í méè-í te cãháⁿ-í dàtná ìⁿ téé ñá túú cùtnuní iní-xi, te yúhú cùú-í ìⁿ téé ío-gá quidé chiúⁿ-gá dàcúúxí cuè téé-áⁿ, te vãi xito ní cuu cãniha ñáyiú xii-í, te vãi xito ní cuu chìhi ñahá-yu vecaá xii-í, te vãi xito ní cuu cãcu cãcu cahni ñaha ñáyiú xii-í. ²⁴ Te cue ñáyiú isràél ní canihá-yu xii-í úhúⁿ xito, te ndi tnahá ìⁿ ìⁿ xito ní canihá-yu ní dáquêe-yu ócó sáhúⁿ cúmí ñi sátà-í. ²⁵ Te úní xito ní caniha tùcu ñáyiú xii-í ndihi carrùtí, te ìⁿ xito ní sáha yúú ñahã-yu xii-í, te ní cuu úní xito quêe naa bàrcú xití ndute òré sácũhuⁿ-í, te ìⁿ xito ío ní ndoho-í ní xíndecu-í ìⁿ nduu ìⁿ niú núú ndute làmár. ²⁶ Te ío titní xichi ní cuu xica cuu-í, te dava xichi ní cácu cuido ñaha ndute ñuhu xii-í, te dava xichi ní cácu duhu ñadúhú nchaa ndachiuⁿ-í, te dava xichi ní cácu cada ñaha cuè ñáyiú cùu ndi mee-í ìⁿ sá cádá ñahá-yu xii-í, te diu-ni ducaⁿ ñi cácu cada ñaha tùcu cue ñáyiú ñá túú cùu ndi mee-í ìⁿ sá cádá ñahá-yu xii-í ní cùu, te cuèi xití ñuú te cuèi xití yucu cãcu cãcu cada ñaha ñáyiú xii-í ìⁿ sá cádá ñahá-yu, te diu-ni ducaⁿ cãcu cãcu quiní-í tnúndòho oré ñúhù-í bàrcú cuáháⁿ núú ndute làmár. Te cue ñáyiú cãhí sá ndécú ìchi Xítohá Jesucrístú te ñá ndàá cácu cãcu cada ñahá-yu xii-í ìⁿ sá cádá ñahá-yu. ²⁷ Te ío ndòho-í cuendá chiúⁿ quide-í chi ío xàú-í, te ní cuu vãi xito ñá túú xidí-í, te titní xito ní cuu xihí víhì-í docó, te titní xito ní cuu yìchí-í ndute, te titní xito ní cuu ñá túú tnàhí ná xéxì-í cuendá chiúⁿ quide-í, te titní xito ní cuu ndòho-í sá víxiⁿ, te titní xito ní cuu ñá túú nihí-í dóó cuihnu-í.

28 Te ñá díú-ní xǎⁿ chi ñⁿ nduu ñⁿ nduu ío sàni iní-í cuendá nchaa ñáyi ndècu ichi Xítóhó Jesucristú xǎndecu nchaa xichi. 29 Te ndèda-ni càa ñáyi ñá túú ñíí ndéé cùndecu ichi Xítóhó Jesucristú, te ío cùndahú iní-í chi sànuu sá tnahá-í ñá túú ñíí ndèé-í cundecu-í ichi-gá sá dúcáⁿ quidé-yu. Te núu ñⁿ ñáyi quidé-yu sá ñⁿ nchohó ñáyi ndècu ichi Xítóhó Jesucristú quidé-ndó ñⁿ sá ñá túú tàú-ndó càda-ndo te vá cúú vǎha iní-í chi cudèⁿ-í. 30 Te núu xǎni ñuhu-xi sá cáda càhnu-í mée-í, te cuu ducaⁿ càda-í te cáhⁿ-í mee-ni cuendá nchaa sá quidé nàcuáa ñá túú ñíí ndéé yǐquǐ cuñú-í. 31 Te Dútú Ndiǒxí Yaá cúú Tátá Xítóhó Jesucristú náhá-gǎ sá yǎhú càhⁿ ndáá-í núú-ndó, te diu-gá tàú-gá cachí-ó sǎ ío càhnu cuu-gá ni caa ni quíhⁿ. 32 Te cútnáhá ní xǎndecu-í ñuú Dàmascú te tée cùu gobiernú tée cùndíhi tée yǐndaha ñáyi nàni Aretás ní taxi ndecu-dé cue tée ní xǎndedí yuyèhe sá ñúhú dòco ñuú cuendá òré quee-í te tñi ñaha-güedě xii-í ní cùu. 33 Dico yúhú ní queé-í ñⁿ xití tídihi, te cue ñáyi cùndíhi ñaha xii-í ní queñuhu ñàhá-yu ndàa ventaná nchíi yǐquǐ naha sǎ ñúhú dòco ñuú-áⁿ, te ducaⁿ te ní cácu-í ñá túú ní ndàcu-güedé tñi ñaha-güedě xii-í.

12

Té Pǎblú càhⁿ-dé sá ío vii càa sá ñí dánèhé núú ñàhá Xítóhó Jesucristú xii-dé

1 Te ñá túú ndéé nándíhi-xi sá càhⁿ váha-o cuendá mée-ó, dico vitna xǎni ñuhu-xi ducaⁿ cada-í chi cáhⁿ-í nàcuáa ní quide ñaha Xítóhó Jesucristú xii-í, chi ní quide-gá sá ñí cutnùní iní-í nàcuáa ndùu

tnúhu-gá, te vâi núú sǎ ñĩ dánèhé núú ñáhá-gǎ xii-í. ² Te yúhú xìní-í ñⁿ téé sàndáá iní ñáhá xìi Xítóhó Jesucrístú, te sa ní cuu úxícúmí cuiá sǎ tée-áⁿ ñĩ sáá-dé ndéé andiú cùu uní, te ñá túú xìní-í te núu ndihì yiqui cùñú-dé ní sáá-dé àdi ñáhá, chi ñⁿdìi díi-ni Yá Ndiõxí náhá-gǎ te núu nása càa-dé ní sáá-dé. ³ Te yúhú càháⁿ ndáá-í cuendá téé-áⁿ, dico dàtná ní cachí-í sá ñà túú xìní-í te núu ndihì yiqui cùñú-dé ní sáá-dé andiú àdi ñáhá, chi mee Yá Ndiõxí náhá-gǎ te núu nása càa-dé ní sáá-dé. ⁴ Te téé-áⁿ ñĩ sáá-dé ñⁿ xichi núú ïo váha càa andiú, te yàcáⁿ ní xíndedóho-dé tnúhu mee-ni sǎ cúú-xí cuendá méé-dé, te tnúhu-áⁿ vǎ cúú tnàhí cáháⁿ-dé núú ñi ñⁿ ñáyiu. ⁵ Te yúhú quidé ññu-í téé-áⁿ, dico mee-ï ñá túú càháⁿ váha-í cuendá-í cuendá cada nínu-í méé-í, chi càháⁿ-ni mee-ni cuendá nchaa sá quidé nàcuáa ñá túú ñihí ndéé yiqui cùñú-í. ⁶ Te núu dícó yúhú cuini-í te cuu cáháⁿ váha-í cuendá-í cuendá cada nínu-í méé-í, te núu ducaⁿ na càháⁿ-í te ñá túú cùu-xi ñⁿ tnúhu neñúú cáháⁿ-í, chi cùu-xi ñⁿ sá càháⁿ ndáá-í te núu na càháⁿ-í. Dico vá dúcáⁿ càda-í chi cuini-í sá nchòhó cada cuendá-ndó nàcuáa ndùu tnúhu càháⁿ-í ndihì nàcuáa quide-í, te ducaⁿ mèe-ndo cáháⁿ-ndó te núu ná téé cùu-í, te ñá díú sǎ yúhú cáháⁿ váha-í cuendá méé-í cuendá nchòhó cachí-ndó sǎ ïo cùnùu-í.

⁷ Te sá ñĩ dánèhé núú ñáhá Xítóhó Jesucrístú xii-í cúú-xí sǎ xidó ïo váha, te cuendá sá vǎ cáda càhnu-í méé-í ññu xíáⁿ Xítóhó Jesucrístú ní quide-gá duha ndòho yiqui cùñú-í vitna. Te sá dúcáⁿ quide ñaha-gá xii-í te xíáⁿ sácúíhná ñĩ ñihí-xi ichi càhnu dandoho ñaha-xi xii-í. ⁸ Te ní cuu úní xito càháⁿ ndàhú-í núú Xítóhó Jesucrístú sá ná cáda-gǎ nàcuáa vá ndóhó-gǎ yiqui cùñú-í. ⁹ Dico mee-gǎ càhí-gá xii-í: “Yúhú ïo

cùndahú iní ñáhà-í xii-n chìndee ñaha-í, te ñá túú ñá cúmăní xii-n, te cùtnuní sá ïo-gá chìndèe-í cue ñáyiú ñá túú ñihí ndéé cùndecu”, duha ní cachí-gá xii-í. Te xiăⁿ nũu yúhú ío cùdǎí iní-í sá ñá túú ñihí ndéè-í ndécù-í, chí ḍiú cuendá xiăⁿ Xítóhó Jesucristú ñá túú dàña nihnu ñaha-gá xii-í chìndèe ñaha-gá. ¹⁰ Te xiăⁿ nũu cùdǎí iní-í sá dúhá ñá túú ñihí ndéè-í ndécù-í, te cùdǎí tucu iní-í cuendá nchaa tnúhu cuèhé tnúhu duha càháⁿ ñáyiú cuendá-í, te cùdǎí iní-í cuendá nchaa sá ndóhò-í, te cùdǎí tucu iní-í cuendá sá quidé ñàha ñáyiú xii-í, te cùdǎí tucu iní-í cuendá nchaa dava-gá sá ndóhò-í cuendá Xítóhó Jesucristú. Te òré ñá túú ñihí ndéè-í te Xítóhó Jesucristú chìndèe ñaha-gá xii-í ñihí ndéè-í.

Té Păblú ío sàni iní-dé cuendá cue ñáyiú xĩndecu ichi Xítóhó Jesucristú ndécú ñùù Còrintú

¹¹ Te cùu-í dàtná ìⁿ tée ñá túú cùtnuní iní-xi sá dúhá càháⁿ váha-í cuendá-í, te ducaⁿ quide-í chí mee-ndo quide-ndo sá dúcáⁿ càháⁿ-í, dico mee-ndo tàú-ndó càháⁿ váha-ndo cuendá-í ní cùu. Te dava cue tée ío quide cahnu-güedé méé-güedě, te càchí-güedé sá Xítóhó Jesucristú ní táúchíúⁿ-gă sá càháⁿ-güedé tnúhu-gá, dico yúhú cúnùu-gá-í dàcúxí cuè tée-án cuèi ñá túú vèdana ná cùú-í ndécù-í ñuyíú-a. ¹² Te cúnàhá ní xĩndecu ndihí ñaha-í xii-ndo ïo ní quide càhnu iní-í nándi sá ñí yáha-í ní quide-í chiuⁿ Xítóhó Jesucristú sá cúú-xí-ndó. Te ní chindee ñàha-gá xii-í ní quide-í titní núú sã vã yõ tnàhí ndàcu cada te ní cuñúhu-ndo, te sá dúcáⁿ ñí chindee ñàha-gá xii-í ní cutnùní iní-ndó sã yúhú cúú ndisa-í ìⁿ tée ní cachí Xítóhó Jesucristú sá càháⁿ-í tnúhu-gá. ¹³ Te

yúhú ñⁿ-ni quide ndìhì ñaha-í xii-ndo ndìhì nchaa dava-gá cue ñáyiú ndècu ichi Xítóhó Jesucrístú, te dícó-ni sá yúhú ñá túú ní cuìní-í taxi-ndo sã xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ ñí quide-í ñá túú ní cuìní-í chindee ñàha-ndo te chí cádá càhnu iní ñáhá xii-í.

¹⁴ Te vitna sa ndècu túha-í sá quíxì-í núú ndécú-ndó, te sá quíxí còto ñaha tucu-í xii-ndo cùu-xi xito cuu úní sá quíxì-í, te cuìní-í sá vã dándìhú-ndó ìní-ndó ndùcu-ndo sá táxì-ndó cùu xii-í, chi ñá díú xǎⁿ ndèé iní-í chi mee-ndo ndèé iní-í quixi-í. Te duha càháⁿ-í chi nchòhó xìní-ndó sã cuè téé cùu tátá sãñaha-güedě sá cúú-xí cuè déhe-güedé te ñá díú cuè déhe-güedé sãñaha-güedé sá cúú-xí mèe-güedé. ¹⁵ Te yúhú ío váha cùu iní-í dandòñuhu-í sá ndécú ndìhì-í nàcuáa ndacu-í chindee ñàha-í xii-ndo cùndecu váha-ndo sã cúú-xí Yã Ndiòxí chi ío cùdí ìní-í, te cuèi na cùu-í sá cuendá-ndó, chi ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sànuu sá nchòhó ñá túú cùu iní ñáhá càvihi-ndo xii-í.

¹⁶ Te nàha-ndo sá ñà túú ní dándìhú-í iní-ndó ñá taxi-ndo cùu xii-í, dico dava-ndo càchí-ndó sã ío váha ní xito-í nàcuáa ní quide-í nàcuáa ní dándàhú ñáhà-í xii-ndo. ¹⁷ Te chí càháⁿ te núu yúhú ní dándàhú ñáhà-í xii-ndo ndìhì cue téé ní tendaha-í ní quixí coto ñaha xii-ndo. ¹⁸ Te ní cáháⁿ ndàhú-í núú tẽ Titú ndìhì núú ìngá tucu téé ndècu ndìhì-o ichi Xítóhó Jesucrístú ní quixi coto ñaha-güedě xii-ndo. Te nchòhó cútnùní iní-ndó sã tẽ Titú ñá túú ní dándàhú ñáhá-dě xii-ndo, te ducaⁿ chi ñⁿ-ni sàni iní-ndí te ñⁿ-ni quide-ndí.

¹⁹ Te cudana te sàni iní-ndó sã sà dúhá càháⁿ-ndí

te tàunihnu-ndí mée-ndí, dico ñá díú dùcaⁿ quee-xi tnúhu càháⁿ-ndí, chi càháⁿ-ndí nàcuáa tàú-xi cáháⁿ-ndí chi ndècu ndíhi-ndí Xítóhó Jesucrístú, te mee Yă Ndiǒxí náhá ndăá-gá nàcuáa ndùu tnúhu càháⁿ-ndí, te nchaa sá càháⁿ-ndí cúú-xí cuendá nchòhó cue ñáyiú ío cùu iní-ndí, te càháⁿ-ndí nàcuáa cundecu váha-ndo ìchi Xítóhó Jesucrístú. ²⁰ Te ío sàni iní-í cuendá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nacuáa cuu váha iní-í, te sá dúcáⁿ te yúhú cáháⁿ-í nàcuáa vá cúú văha iní-ndó, te ducaⁿ ïo sàni iní-í cuendá-ndó chi na cuáháⁿ òré quexìo-í te nàá-ndó, àdi ndecu-ndo ichi cuédú íní, àdi cudééⁿ nùú tnáhá-ndó, àdi ñá túú cùu ìⁿnuu-ndo ndecu-ndo, àdi cáháⁿ cuèhé-ndó cuendá tnàha ñáyiú-ndo nùú chítú nùú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. ²¹ Te ío sàni iní-í cuendá-ndó chi na cuáháⁿ òré quixi-í, te Yă Ndiǒxí cada-gá te cucahaⁿ núù-í sá cuendá-ndó, te ío ndíhú iní-í cuendá-ndó te núu vátá dáńá-gă-ndó nchàa sá cuèhé sá dúhá nǐ ngüíta-ndo quide-ndo ndéé sanduu, te vâi-ndo ní ngüíta-ndo dùcaⁿ quide-ndo, chi ndècu-ndo ichi díí íní te nândi-gá nchaa sá cuèhé sá dúhá quide-ndo, te ducaⁿ ïo ndíhú iní-í te núu vátá dáńá-gă-ndó nchàa xíáⁿ.

13

Tnúhu ndéé núú nǐ ndíhi-ná

¹ Te sá quixì-í vitna núú ndécú-ndó cùu-xi xito cuu úní sá quixí còto ñaha-í xii-ndo. Te càchí tnúhu-í xii-ndo sǎ òré cundáá cuèchi-ndo te canehe núú ǔú àdi úní ñáyiú cáháⁿ ndáá nàcuáa

ndùu cuéchi-ndo. ² Te yúhú sa ní cáháⁿ-í dóho-ndo cùtnàhá ní quixi-í ní quixi coto ñaha-ĩ xii-ndo xìto cuu úú, te ñiu-ni ducaⁿ càháⁿ tucu-í dóho-ndo vitna vátá quíxí tùcu-gá-í quixi coto ñaha-ĩ xii-ndo. Te nchòhó ñáyiú ní cunduu ñí ngúíta quide nchaá sá cuèhé sá dúhá, tenàá ñáhà-í xii-ndo òré quexìo-í te núu vátá dáñá-gă-ndó nchàa sá cuèhé sá dúhá quide-ndo te tnàhá nchaá dava-gă-ndó tènàá ñáhà-í xii-ndo. ³ Te nchòhó cuìní-ndó quìní-ndó núu ndáá sá quidè-í núú Xìtohó Jesucristú càháⁿ-í yuhu-gá, dico dàvá-áⁿ cutnùní ndáá iní-ndó. Te Xìtohó Jesucristú quidé-gă nàcuáa cutnùní iní-ndó sã ìo càhnu cuu-gá te ñá túú quide-gá dàtná quidé ìⁿ ñáyiú ñá túú ñìhí ndéé cùndecu. ⁴ Te Xìtohó Jesucristú ní ndoho-gá dàtná ìⁿ ñáyiú ñá túú ñìhí ndéé cùndecu, chì ní sahnì ñaha-güedě xii-gá núú cùrúxí dico mee Yă Ndiöxí ní quide-gá ní ñìhí ndéé Xìtohó Jesucristú ní ndoto-gá ndécú-gă vitna, te tnàhá nchúhú tucu ducaⁿ yăha-ndí ñá túú ñìhí ndéé-ndí cundecu-ndí, dico mee Yă Ndiöxí chíndèè ñaha-gá xii-ndí ñìhí ndéé-ndí ndécú-ndí cuèndá sá ndécú ndìhi-ndí Xìtohó Jesucristú, te xíáⁿ núu ndàcu-ndí quidé-ndí nàcuáa tàú-xi cunduu sá cúú-xí-ndó.

⁵ Te chí cádá cuèndá váha te núu ndisa sá sàndáá iní-ndó tnùhu Xìtohó Jesucristú, te núu ndáá sá ndécú-ndó ìchi-gá te cùtnuní iní-ndó sã ndécú-ndó ndìhi-gá. ⁶ Te cuìní-ndí sá nchòhó cutnùní ndáá iní-ndó sã nchúhú ndécú ndìhi ndisa-ndí Xìtohó Jesucristú. ⁷ Te nchúhú càháⁿ ndìhi-ndí Yă Ndiöxí cuèndá-ndó cuèndá sá vă cádá-ndó ñì ìⁿ sá cuèhé sá dúhá, te vá cánì iní-ndó

să sà dúcáⁿ cãháⁿ ndihî-ndí-gá cuendá-ndó, te cuínî-ndí sá nchòhó cutnùnî iní-ndó sã nchũhú ío ndècu yiñuhu-ndí núú-gã, te ñáhá chi cãháⁿ ndihî-ndí-gá cuendá-ndó chi cuínî-ndí sá nchòhó cada váha-ndo cùndecu-ndo cuéi sàni iní-ndó sã nchũhú cúú-ndĩ cue téé ñá túú ndècu yiñuhu núú-gã. ⁸ Te nchúhú mee-ni cãháⁿ váha-ndí cuendá tnúhu ndáá tnúhu Yá Ndiõxí, te ñá túú cãháⁿ-ndí ìⁿ tnúhu sá ñà túú tàú-xi cãháⁿ-ndí cuendá tnúhu-áⁿ. ⁹ Te cùdíí ìní-ndí sá ñà túú-gã xínî ñũhu-xi cada-ndí nàcuáa níhî ndéé-ndĩ tenáá ñáhá-ndĩ xii-ndo cãháⁿ-ndí dóho-ndo, chi nchòhó sa ní níhî ndéé-ndó ndècu-ndo ichi-gá. Te nchúhú cãháⁿ ndihî-ndí Yá Ndiõxí cuendá-ndó cuendá sá nchòhó cundáá-ndó cùndecu-ndo ñá túú-gã ná cumánî-ndó núú-gã. ¹⁰ Te xĩáⁿ nõu duha ndũu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndihî ñaha-í xii-ndo, cuendá sá òré ná cùndecu ndihî ñaha-í xii-ndo te vá ío níhî cãháⁿ-í dóho-ndo nàcuáa ndũu tnúhu ndee ìní ní taxi Xítohó Jesucrístú ndécú ndihî-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiu ndècu ndihî-ndí ichi Xítohó Jesucrístú ío quíde ndee iní ñáhá-ndĩ xii-ndo, te ío chí ndúcú nàcuáa cada-ndo cundáá-ndó núú Yá Ndiõxí cuendá sá ñà túú tnáhî-gã ná cumánî-ndó núú-gã, te ndee ndèe cada iní-ndó cùndecu-ndo, te chí cúú ìⁿnuu cundecu ndihî tnaha, te ducaⁿ te Yá Ndiõxí cundecu ndihî ñaha-gã xii-ndo chi ío cùu iní ñáhá-gã xii-o, te ñiu-gá quídé-gã ío váha cùu iní-ó ndècu-o. ¹² Te

ndihì tnúhu yĩñùhu chí cádá ndèe iní tnáhá. ¹³ Te nchaa ñáyiú cùu cuendá Yă Ndiǒxí ndécú ìha quide ndee iní ñáhă-yu xii-ndo.

¹⁴ Te xìcáⁿ táhú-ndǐ núú Xǐtohó Jesucrìstú sá ìo na chìndee chítúu ñaha-gă xii-ndo. Te mee Yă Ndiǒxí ná cádá-gă nàcuáa cutnùní iní-ndó sǎ ìo cùu iní ñáhá-gă xii-ndo, te Espíritú-gá cundee cùu cahnu iní-ndó cùndecu-ndo. Te ducaⁿ na cùnduu. Te ío chí cádá ndèe iní-nă vitna.

Tnúhu ní cáháⁿ yá ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 3 Mar 2023 from source files
dated 29 Jan 2022

872f7754-0986-5ecd-a059-925a708a6939